

周易引經通釋

周易引經通釋

黃岡李鈞簡輯註

澍滋校字

周易上經

三三 兌下 坤上

臨元亨利貞至于八月有凶

爾雅監瞻臨泣視也監泣瞻視於義為臨案文從

監省從品 **國語**千品萬官一人監於品物之上臨

之義也 **穀梁傳**春秋有臨天下之言焉有臨一國

之言焉有臨一家之言焉以上臨下撫有之也齊

家治國平天下皆臨之義也。中庸唯天下至聖爲能聰明睿知足以有臨也。寬裕溫柔足以有容也。發強剛毅足以有執也。齊莊中正足以有敬也。文理密察足以有別也。仁義禮知卽元亨利貞之德。知臨之君所以臨天下者也。自本卦二陽之月至遯卦二陰之月爲八月。孟子七八月之間旱夏正之六月卽周正之八月陰長陽消爲有凶也。陽之方長卽慮陰之將來。孟子一日暴之十日寒之未有能生者也。吾見亦罕矣。吾退而寒之者至矣。至

於八月有凶先爲垂戒之義也。書：予臨兆民，懷不若朽索之馭六馬。爲人上者，奈何不敬臨民者之所以自成也。禮記：不臨深臨之爲義，與登高同於臨民之義，有取焉。天之於澤，至遠不曰臨而曰履，以其分定也。地之於澤，至近不曰履而曰臨，以其勢逼也。卦義精切如是。

彖曰：臨，剛浸而長。

禮記：春作夏長，仁也。復一陽爲陽，生臨二陽爲陽長，故曰剛長。周禮：揚州其浸五湖，荊州其浸潁、湛。

水之漸長者爲浸而長取諸地澤之義也

說而順剛中而應

禮記內和而外順則民瞻其顏色而弗與爭也望

其容貌而民不生易慢焉故德輝動於內而民莫不承聽理發諸外而民莫不承順此所謂說而順

剛中而應也其德爲說而順**書**臨下以簡御衆以

寬上有易良之德則下有歡附之心其體爲剛中

而應**論語**居敬而行簡以臨其民中有主而自治

族則事不煩而民不擾此皆所以臨民之本也

大亨以正天之道也

詩皇矣上帝臨下有赫監觀四方求民之莫四德

合乎乾乾之道是天之道 **詩**上帝臨女無貳爾心

牧野之師即所謂大亨以正者上合天道下應人

心天臨君臨其養一也

至于八月有凶消不久也

孟子苟得其養無物不長苟失其養無物不消沒

而長即日消不久者消長之機至速可不戒哉 **論**

子原泉混混不舍晝夜盈科而後進放乎四海有

本者如是苟爲無本七八月之閒雨集溝澮皆盈其澗也可立而待也有本卽陽之浸而長者無本卽陽之消不久者其理如是可見地澤之義

象曰澤上有地臨君子以教思无窮容保民无疆

爾雅望厓洒而高岸言視水之厓其下水深其厓

高峻曰岸此澤上有地之象也所以爲臨 **孟子**君

子之所以教者五有如時雨化之者有成德者有達財者有答問者有私淑艾者此言教思无窮也

詩無思不服故曰教思 **周**用康保民用康乂民此

言容保民无疆也。有容德乃大。故曰容保民。君子賢其賢而親其親，小人樂其樂而利其利。此以沒世不忘也。无窮无疆之義，蓋如是。

初九咸臨貞吉

周禮大咸堯樂禮記咸池備矣。言其德無所不施。

此咸臨之義。澤山為咸地。澤亦取其相感也。用

咸和萬民。咸臨之謂也。論語臨之以莊則敬。不莊

以泄之則民不敬。咸臨貞吉之謂也。

象曰咸臨貞吉志行正也

論語政者正也子帥以正孰敢不正志之行正臨
民之道也**孟子**行一不義殺一不辜而得天下不
爲也咸臨而必行正者此其義也在初故曰志

九二咸臨吉无不利

初二皆言咸臨者以陽臨陰又與二陰相應二陽
又取均遍之義**孟子**諫行言聽膏澤下於民剛中
有應是以能感中順之君**左傳**仁人之言其利溥
哉是以咸臨而曰吉无不利

象曰咸臨吉无不利未順命也

禮記君命順則臣有順命君命逆則臣有逆命順乎道不順乎命是以謂之未順命
書予違汝弼汝無面從退有後言是能感君心者非徒順君命矣
六三甘臨无攸利既憂之无咎

左傳幣重而言甘誘我也甘之爲義如此以甘臨之私恩小惠之術也
禮記君子之接如水小人之

接如醴君子淡以成小人甘以壞盜言孔甘亂是用餽君子不以口譽人口惠而實不至君子不以色親人情疏而貌親此甘臨之无攸利也
孟子王

者之民皞皞如也霸者之民驩虞如也咸臨曰无不利甘臨曰无攸利大小公私之辨在是矣**論語**人無遠慮必有近憂剛之浸長自此爻終八月之凶自此爻始所以可憂之故也**左傳**知懼如是斯不亡矣既憂則能改所以无咎

象曰甘臨位不當也既憂之咎不長也

書罔違道以千百姓之譽甘臨非在上之有故不

當位自三至上又取上臨下之象故三四皆曰位

孟子君子有終身之憂無一朝之患咎之不長用

此道也。**論語**既往不咎象日消不久欲人之知戒象日咎不長望人之能改其義一也

六四至臨无咎

地澤相近四與初應又爲相臨之至。**禮記**民之父母必致五至而行三無志之所至詩亦至焉詩之所至禮亦至焉禮之所至樂亦至焉樂之所至哀亦至焉至者至於民也吾志所至使民各達其情各安其分各樂其樂各哀其哀而天下平矣至臨之義亦以其相感而言也故无咎

象曰至臨无咎位當也

左傳照臨敝邑親至其地謂之臨德之所臨本無不至位之所臨則其至尤切也故曰位當**左傳**君子在位可畏施舍可愛進退可度周旋可則容止可觀作事可法德行可象聲氣可樂動作有文言語有章以臨其下謂之有威儀也此至臨爲位當之義甘臨曰位不當者**詩**無已太康職思其憂不知其憂則不盡其職也至臨曰位當者**詩**不解于位民之攸墜能勤其職則能臨其民也

六五知臨大君之宜吉

孟子知者無不知也當務之爲急堯舜之知而
徧物急先務也是謂知臨**書**明四目達四聰不自

用其聰明而無不明無不達此知臨之本也**左傳**

君人者將昭德塞違以臨照百官故曰大君之宜

中庸成己仁也成物知也故時措之宜也知臨之

所以宜也**詩**宜民宜人受祿于天大君之宜所以

吉也

象曰大君之宜行中之謂也

中庸舜其大知也與執其兩端用其中於民其斯
 以為舜乎行中之謂也**書**惟精惟一允執厥中又
 王懋昭大德建中于民以義制事以禮制心行中
 者古今君道之極則也

上六敦臨吉无咎

孝經君親臨之厚莫重焉敦臨之義也**中庸**大德

敦化敦臨之本也**中庸**敦厚以崇禮敦臨之用也

書在知人在安民知人則哲能官人安民則惠黎

民懷之知人蓋言乎知曉安民蓋言乎敦臨也**書**

帝光天之下至于海隅蒼生萬邦黎獻共惟帝臣
知臨言其可大也言地平天成六府三事允治萬
世永賴敦臨言其可久也

象曰敦臨之吉志在內也

論語慎終追遠民德歸厚矣志在內者不馳騁於
外也言堯曰朕在位七十載汝能庸命異朕位舜
曰朕宅帝位三十有三載耄期倦于勤汝惟不息
總朕師志在內卽志之行正者與泰之志在外對
言臣道之始志在國君道之久志在民觀古帝之

敦臨可知矣

三三 坤下 巽上

觀盥而不薦有孚顒若

爾雅觀謂之闕官門雙闕舊章縣焉使民觀之禮

謂之觀此觀之所由名也 **爾雅**觀示也有以示人

而為人所仰是觀示之義也案文從舊從見 **爾雅**亦

既見止亦既覲止我心則說相見而歡是又觀禮

之義也 **周禮**以禋燎祀飗師兩師風之文亦從其

風地之所以為觀也 **周禮**春官禋人凡禋事沃酒

夏官小臣大祭祀沃盥將祭而潔手也爾雅薦

陳也既祭而陳享也禮記籩豆之薦四海九州之

美味四時之和氣也盥在將祭之初薦在既灌之

後盥而未薦可以觀誠敬專一之時也論語子曰

居上不寬爲禮不敬吾何以觀之哉子曰蒞自既

灌而往者吾不欲觀之矣下之觀瞻必自上之觀

示祭其大焉者也詩顯顯印印如珪如璋令聞令

望爾雅顯顯印印君之德也德容之外見者也禮

記有所竭情盡慎致其敬而誠若有美有文而誠

若誠意之自中出者也

彖曰大觀在上順而巽中正以觀天下

左傳有威而可畏謂之威有儀而可象謂之儀是

大觀在上之義也 **書**允恭克讓順而巽之德也 **書**

無偏無黨王道蕩蕩無黨無偏王道平平無反無

側王道正直會其有極歸其有極中正以觀天下

也 **周禮**時文思索允臻其極嘉量既成以觀四國

卽一器而凡典章文物之觀天下者可知也 **左傳**

古者明王伐不敬取其鯨鯢而封之以爲大戮於

是乎有京觀勸善者示之觀懲惡者亦示之觀也
中正之義於是乎備

觀盥而不薦有孚顒若下觀而化也

禮記七日戒三日齋以教敬也故堂上觀乎室堂

下觀乎上此下觀之義也**中庸**奏假無言時靡有
爭是故君子不賞而民勸不怒而民威於鈇鉞此
下觀而自化之義也

觀天之神道而四時不忒聖人以神道設教而天下
服矣

詩上天之載無聲無臭天之神道也禮記天有四

時春夏秋冬風雨霜露無非教也四時不忒天之

神道設教也孟子所過者化所存者神聖人之神

道也禮記天地之道寒暑不時則疾風雨不節則

饑教者民之寒暑也教不時則傷世事者民之風

雨也事不節則無功神道設教聖人之四時不忒

也禮記天道至教聖人至德聖人之神道即本乎

天也家語民賴其利百年沒而民畏其神百年用

其教百年故曰黃帝三百年聖人以神道設教而

天下服此之謂也後世託於鬼神者誣矣

象曰風行地上觀先王以省方觀民設教

論語君子之德風小人之德草草上之風必偃此

風行地上之象也**書**彰善癉惡樹之風聲弗率訓

典殊厥并疆此觀之義所以取乎風也**穀梁傳**常

事曰視非常曰觀觀之爲義政之大者也**孟子**齊

景公曰吾何脩而可以比於先王觀也晏子曰天

子適諸侯曰巡狩諸侯朝於天子曰述職春省耕

而補不足秋省斂而助不給無非事者先王之觀

此其義也。書歲二月東巡狩至于岱宗五月南巡狩至于南岳八月西巡狩至于西岳十有一月朔巡狩至于北岳省方之謂也。禮記命大師陳詩以觀民風命市納賈以觀民之所好惡觀民之謂也。禮記國奢則示之以儉國儉則示之以禮設教之謂也。

初六童觀小人无咎君子吝

卦以觀示爲義又以觀瞻爲義皆觀乎九五者亦聖人作觀之義也。望遠者察其貌而不察

其形初與五違故曰童觀禮記童子曰聽事意者
未冠之稱童觀言不能見遠也詩不識不知順帝
之則小人之所以无咎也孟子子行之而不著焉習
矣而不察焉君子則有吝矣左傳昭公生十九年
矣猶有童心此君子之童觀者也故以為戒
象曰初六童觀小人道也

周禮大宰正月之吉縣治象之法於象魏使萬民
觀治象初六童觀亦猶發蒙之意啟導之於先也

論語民可使由之不可使知之小人由其道君子

則宜知其道矣

六二闕觀利女貞

左傳婦人送迎不出門見兄弟不踰闕在門以內

曰闕**公羊傳**踊于楮而闕客是闕觀之義也**闕**女

曰觀乎士曰既且且往觀乎消之外洵訐且樂維

士與女伊其相謔游觀非女之正也故曰闕觀利

女貞**禮記**季春禁婦女毋觀是即利貞之義也

象曰闕觀女貞亦可醜也

孟子鑽穴隙相窺踰牆相從父母國人皆賤之仕

不由其道者鑽穴隙之類也女子之闕失其貞男子之闕更失之矣**闕**中菁之言言之醜也闕尙爲女觀之貞男則貞而亦醜矣猶初之小人无咎君子吝恒之婦人貞吉夫子凶也君子知童觀之不能見遠**儀禮**去爾幼志順爾成德可以明成人之道也君子知女觀之所見者小**孟子**以順爲正者妾婦之道也可以見丈夫所羞也**禮記**幼子常視毋誑此得童觀之正矣**書**觀厥刑于二女此得女觀之正矣

六三觀我生進退

論語君子求諸已觀我生之義也**禮記**君子三揖而進一辭而退交際之進退所當觀者也**孟子**治則進亂則退出處之進退所當觀者也**禮記**事君者量而后入不入而后量觀我生進退以自審也象曰觀我生進退未失道也

孟子進以禮退以義得之不得曰有命進退之道未失也**孟子**得志與民由之不得志獨行其道志

在行道故曰未失

六四觀國之光利用賓于王

書是訓是行以近天子之光觀國之光者也**書**賓

于四門四門穆穆諸侯之來朝者曰賓也**書**修其

禮物作賓于王家先代之後曰賓也**詩**我有嘉賓

鼓瑟吹笙昭德音而示周行**周禮**大司徒以鄉三

物教萬民而賓興之獻賢能而詔祿位皆所謂利

用賓于王也**左傳**吳季札聘魯請觀於周樂晉韓

宣子聘魯觀書於大史氏凡爲賓皆有觀之禮也

左傳陳敬仲奔齊陳侯使筮之遇觀之否曰是謂

觀國之光利用賓于王此其代陳有國乎不在此
其在異國非此其身在其子孫光遠而自他有耀
者也坤土也巽風也乾天也風爲天於土上山也
有山之材而照之以天光於是乎居土上故曰觀
國之光庭實旅百奉之以玉帛天地之美具焉故
曰利用賓于王猶有觀焉故曰其在後乎風行而
著於土故曰其在異國乎若在異國必姜姓也山
嶽則配天物莫能兩大陳衰此其昌乎此亦釋爻
象之義凡爲占者皆可以引伸觸類矣

象曰觀國之光尙賓也

孟子舜尙見帝帝館甥于貳室亦饗舜迭爲賓主
是天子而友匹夫也臣而賓之尙德之義也禮記
有虞氏貴德而尙齒夏后氏貴爵而尙齒殷人貴
富而尙齒周人貴親而尙齒尙之爲義明其所貴
風示天下之意也

九五觀我生君子无咎

陽剛中正以居尊位天下所觀者也而曰觀我生
者**中庸**君子之道本諸身徵諸庶民考諸三王而

不繆建諸天地而不悖質諸鬼神而無疑百世以俟聖人而不惑天地鬼神三王百世卽徵諸庶民之實其本諸身者先天下而觀我也**中庸**王天下有三重焉其寡過矣乎无咎之謂也謂之生者**孟子**生於其心害於其政發於其政害於其事政事之本皆出於心生之義也謂之我者**孟子**萬物皆備於我矣反身而誠樂莫大焉家國之本皆在於身我之義也**論語**不患無位患所以立不患莫己知求爲可知也九三之觀我生也**孟子**禹思天下

有溺者由己溺之也覆思天下有飢者由己飢之也九五之觀我生也

象曰觀我生觀民也

書古人有言曰人無於水監當於民監觀民之義也
書天聰明自我民聰明天明畏自我民明威天視自我民視天聽自我民聽觀我在於觀民觀民所以觀我也

上九觀其生君子无咎

論語觀其所由察其所安觀其生之義也變文而

言其者自人之觀者言之也**中庸**遠之則有望近之則不厭詩云在彼無惡在此無射庶幾夙夜以永終譽君子未有不如此而蚤有譽於天下者也此君子无咎之義也

象曰觀其生志未平也

書七世之廟可以觀德萬夫之長可以觀政觀其生之志如此**左傳**先王之濟五味和五聲也以平其心成其政也政成而心始平觀其生故曰志未平**書**厥或告曰小人怨汝詈汝則皇自敬德不敢

謂已治已安此志未平之義也 **書**伊尹曰予弗克

俾厥后爲堯舜其心愧恥若撻于市一夫不獲則

曰時予之辜此觀其生而志未平者也

三三

震下
離上

噬嗑亨利用獄

孟子口之於味也有同者焉噬嗑皆從口卦從頤

而象之也 **書**其審克之獄成而孚輸而孚案文噬

從筮與原筮之筮同噬從盍與盍簪之盍同審者

噬之義也孚者噬之義也飲食之象取諸頤烹飪

之象取諸鼎故噬嗑別取象焉曰利用獄者

禮記

濡肉齒決齧而合之所謂噬嗑也齧之而合則亨

矣**論語**片言可以折獄者其由也與以齒決肉則

物之梗者化以言決獄則人之梗者化是以噬嗑

之義利用獄**書**鞭作官刑扑作教刑金作贖刑眚

災肆赦怙終賊刑小懲大戒六爻所陳皆是也故

曰利用

彖曰頤中有物曰噬嗑

禮記食在口是頤中有物之象也**周禮**膳夫掌王

之食飲膳羞鼎十有二物頤中之物卽鼎實也
噬嗑而亨剛柔分動而明雷電合而章柔得中而上
行雖不當位利用獄也

詩中心如噎疏噎者咽喉蔽塞噎則噬者不合而

有滯隔之患故特言噬嗑而亨以明其義上下二

剛爲頤頤中之物有剛有柔**詩**人亦有言柔則茹

之剛則吐之惟仲山甫柔亦不茹剛亦不吐不侮

矜寡不畏彊禦此剛柔分之義茹吐之宜卽噬嗑

之亨也**書**皐陶方祗厥敘方施象刑惟明動而明

之義也 **禮記** 仲春之月雷乃發聲始電是月陽升

奮氣為雷激氣為電 **左傳** 大震電雷電並言者電

與雷同氣雷以電為光故曰雷電合而章 **詩** 倬彼

雲漢為章于天雷電在天亦曰章也六五以柔得

中柔道上行雖不當位而用獄則利 **禮記** 史以獄

成告於正正聽之正以獄成告於大司寇大司寇

聽之棘木之下大司寇以獄之成告於王王命三

公參聽之三公以獄之成告於王王三又然後制

刑此柔得中而上行之義也聽訟非王者之事故

日不當位**書**與其殺不辜寧失不經好生之德洽于民心茲用不犯于有司寧失不經正所謂柔得中者獄之利用其義蓋如此矣

象曰雷電噬嗑先王以明罰勅法

詩燿燿震電不寧不令雷電所以示警先王象之以示威也**左傳**爲刑罰威獄使民畏忌以類其震

曜殺戮雷震電曜天之威也聖人作刑罰以類之

取其象也**書**德威惟畏德明惟明威以象震明以

象離噬嗑之義也**書**墨罰之屬千劓罰之屬千剕

罰之屬五百宮罰之屬三百大辟之罰其屬二百

此所以明罰也**周禮**大司寇縣刑象之灋于象魏

小司寇令以木鐸曰不用灋者國有常刑令羣士

乃宣布於四方憲刑禁士師掌國之五禁之灋以

左右刑罰司刑掌五刑之灋以麗萬民之罪司刺

掌三刺三宥三赦之灋以贊司寇聽獄訟此所以

勅法也**左傳**士文伯曰火未出而作火以鑄刑器

火如象之不火何爲火有刑象故賁豐旅皆言刑

獄以火象也

初九履校滅趾无咎

周禮掌囚凡囚者上罪梏拳而桎中罪桎梏下罪

桎在手曰梏兩手共曰拳在足曰桎桎即履校也

左傳齊景公繁刑踊貴履賤踊對履言謂其重刑

多而輕刑少也 **書**荆辟疑赦滅趾即荆辟刑足之

刑也 **周禮**凡園土之刑人也不虧體履校尚不虧

體曰履校滅趾則履校之設正所以為滅足之戒

故望其无咎也滅鼻滅耳皆同此解

象曰履校滅趾不行也

左傳鮑莊子之知不如葵葵猶能衛其足**又**君子謂強鉏不能衛其足曰衛足者皆言慎行之義所以爲不行之戒也

六二噬膚滅鼻无咎

儀禮雍人倫膚九實於一鼎膚謂肉之柔脆者噬之易者也**書**剕辟疑赦滅鼻卽剕辟割鼻之刑也

滅趾滅耳皆以受刑者取象爲戒此獨以聽獄者取象爲戒二爻已當噬之用也三四五曰腊肉乾肺乾肉肉陳喻難斷之獄膚爲脰肉喻獄之易斷

也曰噬膚滅鼻者魚餒肉敗一嗅可知**論語**臭惡
不食正其義也是噬膚之義亦所以爲滅鼻之戒
无咎之占與滅趾同矣

象曰噬膚滅鼻乘剛也

大學所謂誠其意者毋自欺也如惡惡臭惡惡之
正乘剛之義也

六三噬腊肉遇毒小吝无咎

周禮腊人掌凡田獸之脯腊比腊肉之義也**國語**
厚味實腊毒又毒之曾腊者其殺人也滋速肉之

久者有毒獄之久者生變 **左傳** 天子歸胙于公公

田姬賓諸宮六日公至毒而獻之獄之幻也不測

毒之來也無方此皆噬腊遇毒之義也 **左傳** 蠶黃

有毒而況國乎知以遇毒自警者雖小吝而无咎

象曰遇毒位不當也

禮記 君子好其正小人毒其正位不得其正而反

遇小人之毒治獄者在慎所自處也

九四噬乾肺得金矢利艱貞吉

禮記 左殺右肅肺與肅通 **儀禮** 肅四豆設于左肉

之帶骨噬而愈堅者獄之難折者也。周禮秋官司
寇以兩造禁民訟入束矢於朝然後聽之以兩劑
禁民獄入鈞金三日乃致於朝然後聽之入矢取
其直入金取其堅得金矢則難折之獄皆得其情
矣。論語如得其情則哀矜而勿喜是所謂艱貞之
吉也。

象曰利艱貞吉未光也。

左傳小大之獄雖不能察必以情恐其有不察即
未光之義不敢自謂明斷也。

六五噬乾肉得黃金貞厲无咎

周禮 腊人掌乾肉乾其於腊無骨異於肺 **禮記** 乾

肉不齒決決乾肉難於膚而易於腊肺是獄之已

成者前言金矢而此言黃金金矢入於獄前黃金

入於獄後 **周禮** 秋官職金掌受士之金罰貨罰入

于司兵故祇言黃金 **禮記** 金作贖刑注以為黃金是

也得黃金則受罰者皆服其罪矣猶曰貞厲无咎

者 **書** 欽哉欽哉惟刑之恤哉聖王慎刑之心蓋如

此

象曰貞厲无咎得當也

書四罪而天下咸服刑當其罪此之謂也九四臣

位曰得金矢未成之獄是聽獄者**禮記**悉其聰明

致其忠愛以盡之故艱而後貞知其難而後得其

正執法之義也六五君位曰得黃金已成之獄是

定獄者**孟子**文王視民如傷故貞而猶厲正其法

而愈不忍於心愛民之仁也

上九何校滅耳凶

左傳子蕩以弓楛華弱於朝楛爲貴類之義何校

之刑在首者也**左傳**楚子玉治兵實三人耳亦刑耳之象**書**劓人滅耳卽截耳之刑也初二皆言无咎上言凶者觀繫傳小過无傷則何校之戒亦與履校同義在初二猶有肆赦之望在上則有怙終之防故罪大惡極之戒於上著之凶與无咎以初上之象分豈得以滅趾滅鼻與滅耳分輕重哉象曰何校滅耳聽不明也

左傳耳不聽五聲之和爲聾聽而日不明者不明乎聽之道**詩**衰如充耳**又**聽我藐藐皆不明之故

也噬膚噬脂噬肺噬肉自爲一類指折獄者言滅
趾滅鼻滅耳自爲一類指受刑者言噬膚滅鼻兼
言之者以其近初獨以乘剛明之且其義亦可互
見也昔人以滅作沒解皆以屬作一勾讀則疑其
刑之太重故爲是說而於義未安至滅鼻又解作
噬膚者之自滅其鼻文義亦與前後參差竊以小
懲大誡之美推之口履杖戒其滅趾也噬膚戒其
滅鼻也荷校戒其滅耳也初二戒之於始曰无咎
上九戒之於終曰凶皆作戒辭解斷句讀之自明

孝經身體髮膚受之父母不敢毀傷不可滅者也

君子觀於履校之戒滅趾**禮記**一舉足而不敢忘

父母則無滅趾之患矣君子觀於墜膚之戒滅鼻

書無起穢以自臭恐人倚乃身迂乃心則無滅鼻

之患矣君子觀於荷校之戒滅耳**書**聰聽祖考之

彝訓則無滅耳之患矣**論語**君子懷刑君子守身

之義莫切於是**書**刑期于無刑王者刑措之風不

亦可以觀其成哉

三三 離下
艮上

賁亨小利有攸往

詩山有嘉卉侯栗侯梅草木之文也**詩**萋兮斐兮

成是貝錦鱗介之文也卉貝之字合而成賁**中庸**

今夫山草木生之寶藏興焉山下之火文采著見

是以爲賁**書**賁若草木正其義也**書**用宏茲賁象

之煥然而新者賁之亨也**禮記**無本不立無文不

行有質而後有文賁之所以事者本之立也文不

可以太過小利有攸往者文之行也

象曰賁亨柔來而文剛故亨分剛上而文柔故小利

有攸往天文也

乾體在下本剛而柔來文之質為主而濟以文坤

體在上本柔而分剛上以文之文不可過而濟以

質**禮記**禮滅而進以進為文樂盈而反以反為文

樂之以反為文者得柔之來而為文也禮之以進

為文者柔之分剛上而為文也先儒謂天文也上

當有剛柔交錯四字**論語**質勝文則野文勝質則

史文質彬彬然後君子此所謂剛柔交錯者也**左**

傳經天緯地謂之文自然之運是天文也**禮記**以

日星爲紀日有次度星有列宿禮記孟春之月日
在營室昏參中旦尾中孟夏之月日在畢昏翼中
旦婺女中日星所以授時天文之顯著者也書日
中星鳥日永星火義亦同之詩日出有曜離爲日
春秋隕石于宋五良爲石石之精爲星見於天火
之精爲日照於地賁之取義於天文者是其象也
文明以止人文也

大學穆穆文王於緝熙敬止文明以止之謂也爲
人君止於仁爲人臣止於敬爲人子止於孝爲人

父止於慈與國人交止於信燦然有禮以相接截
然有分以相守是人文也

觀乎天文以察時變觀乎人文以化成天下

書在璿璣玉衡以齊七政是觀乎天文也**左傳**登

觀臺以望凡分至啟閉必書雲物爲備故也是以

察時變之義也**孟子**使契爲司徒教以人倫父子

有親君臣有義夫婦有別長幼有序朋友有信是

觀乎人文也**論語**周監於二代郁郁乎文哉是以

化成天下之義也

象曰山下有火賁君子以明庶政无敢折獄

孟子舜使益掌火益烈山澤而焚之禽獸逃匿此

山下有火之象可以燭幽隱驅凶頑故義取於賁

也**家語**孔子嘗自筮其卦得賁焉愀然有不平之

狀子張進曰師聞卜者得賁卦吉也而夫子之色

有不平何也孔子曰以其離耶在周易山下有火

謂之賁非正色之卦也夫質也白宜正白黑宜正

黑今得賁非吾兆也吾聞丹漆不文白玉不雕何

也質有餘不受飾故也此解賁卦之義**禮記**八政

飲食衣服事爲異別度量數制此庶政之謂也

庶績成熙政治之具所當文飾者明之義也

囚服念五六日至于旬時不蔽要囚是所謂无敢

折獄者審慎之思非寡斷之謂也

良折獄折獄以實不以文深文文致皆明之過者

日无敢止之義也

文王罔攸兼于庶言庶獄庶

慎庶獄庶慎文王罔敢知于兹言文王不侵下職

明於求才謹於任賢此亦內離明而外艮止之義
初九賁其趾舍車而徒

禮記足容重足容卽足之文所謂賁也**禮記**堂上接武堂下布武趨中采齊行中肆夏皆賁其趾之義也**左傳**服美不稱必以惡終美車何爲此舍車之義也**禮記**君子耆老不徒行舍車而徒者富貴不處君子賁其趾也

象曰舍車而徒義弗乘也

孟子非其義也非其道也繫馬于駟弗視也此弗乘之義也**論語**不義而富且貴於我如浮雲可以知舍車而徒之義矣

六二賁其須

附其人美且德頤下曰須文之見於面者此舊說也
在仙至於靈王生而有須此須之異者須於面
 最後出故亦有待義細繹此爻之義須者需也且
 以歸妹以須類之皆不當作實字解 **禮記**陰之與
 陽相須而後成也剛柔相須賁其須之正義 **中庸**
 洋洋乎發育萬物峻極于天優優大哉禮儀三百
 威儀三千待其人而後行天地之文亦待人而行
 賁其須之義也

象曰賁其須與上興也

孟子待文王而後興者凡民也興字之義如此蓋

此爻為柔來文剛者上爻為剛上文柔者與上興

也正言相須之義**爾雅**獸曰鬻人曰擣魚曰須鳥

曰臭爾雅曰須屬氣體之所須也獸之奮迅者鬻也

魚之鼓動者須也鳥之張搖兩翅者臭也以此推

之人之天橋亦與物之有所須同也可以明與上

興之義

九三賁如濡如永貞吉

周易引經通釋

卷三

三
三
鶴陰書屋

詩羔裘如濡濡如者言其潤澤之美也**論語**東里

子產潤色之文辭之貴**孟子**若夫潤澤之政事之

貴皆貴如濡如之義也**書**敷貴敷前人受命增飾

其典章法度所謂濡如者也文飾之過則失正**禮**

記管仲鑊簋朱紘山節藻梲君子以爲濫矣故曰

永貞吉

象曰永貞之吉終莫之陵也

書服美于人驕淫矜夸世祿之家鮮克由禮以蕩

陵德自陵其德則陵之者至矣**家語**相陵者生於

長幼無序而遺敬讓 賁得其正故曰終莫之陵

六四賁如皤如白馬翰如匪寇婚媾

書番番良士**左傳**皤其腹一言髮之白一言腹之

白賁如皤如之義也**論語**子夏曰詩云巧笑倩兮

美目盼兮素以為絢兮何謂也子曰繪事後素此

皤如之所以為賁如也**禮記**商人尙白戎事乘翰

白馬謂之翰**孟子**白馬之白無以異於白人之白

也觀其所乘可以知其所尙四與初應在己有皤

如之德初之翰如而來者匪寇也乃己之婚媾也

禮記昏禮者將合二姓之好是婚媾之義也**詩**皎皎

皎白駒賁然來思賢者之來光采之貌是賁如騶

如白馬翰如之謂也**詩**皎皎白駒食我場藿繫之

維之以永今夕所謂伊人於焉嘉客始欲繫維終

爲嘉客是匪寇婚媾之謂也

象曰六四當位疑也匪寇婚媾終无尤也

四應於初爲當位而曰疑者卽賁不苟合之意**禮**

記七介以相見也不然則已愆三辭三讓而至不

然則已愆此疑字之解也**詩**式相好矣無相尤矣

終无尤之義也。婚媾故曰當位，以爲寇故曰疑終。匪寇故曰无尤，純白之心物無能間者如此。

六五黃于丘園，束帛芟芟者終吉。

詩子子干旄在浚之郊，素絲紕之良馬，四之是賁。

于邱園者也。**孟子**伊尹耕於有莘之野，湯使人以

幣聘之，野卽邱園，幣卽束帛之謂也。**儀禮**納帛一

束，束五兩，所以爲聘者。**禮記**束帛加璧，尊德也。專

言束帛所以謂之芟芟。**周書**芟芟巧言瑣屑之辭。

可以明淺小之義。**論語**與其奢也，寧儉者而終吉。

之義也

象曰六五之吉有喜也

詩既見君子云胡不喜有喜之謂也 **孟子**恭敬者

幣之未將者也恭敬而無實君子不可虛拘得賢

之喜在於將幣之誠不徒以外飾之文也

上九白賁无咎

禮記甘受和白受采忠信之人可以學禮白者賁

之本也 **論語**不曰白乎涅而不緇是白賁无咎之

義也 **禮記**酒醴之美立酒明水之尚貴五味之本

也黼黻文繡之美疏布之尙反女功之始也莞簞
之安而蒲越藁屨之尙明之也大羹不和貴其質
也丹漆雕幾之美素車之乘尊其樸也皆賁之復
其始者故曰白賁无咎

象曰白賁无咎上得志也

禮記反本脩古不忘其初在上之位得初之志者

也**中庸**詩曰衣錦尙絺惡其文之著也故君子之
道闇然而日章小人之道的然而日亡惡文之著
君子之志得矣三四象傳曰終莫之陵曰終无尤

謹其終皆欲人反其始也通觀六爻之義剛柔交錯爲賁而總以剛爲本禮記禮有以多爲貴者有以少爲貴者有以大爲貴者有以小爲貴者有以高爲貴者有以下爲貴者有以文爲貴者有以素爲貴者禮之以多爲貴者以其外心者也德發揚詡萬物大理物博如此故君子樂其發也禮之以少爲貴者以其內心者也德產之致也精微觀天下之物無可以稱其德者故君子慎其獨也發揚者所謂柔來文剛故亨也精微者所謂剛上文柔

故小利有攸往也舍車而徒是以下爲貴也賁如
濡如日永貞賁如皤如日匪寇台賁日无咎是以
素爲貴也束帛芟芟是以小且少爲貴也而其不
豐不殺蓋言稱也之義於賁其須一爻括之此可
以明賁之義矣

三三三
坤下
艮上

剝不利有攸往

周禮冬日至令剝陰木而水之斫木曰剝**剝**或剝
或亨殺牲曰剝案文從刀從象以刀象剝剝之義

也五陰方盛一陽將終土崩於下山頽於上皆有

剝象 **詩**我瞻四方感感靡所騁不利有攸往之美

也 **論語**危邦不入亂邦不居知其剝也

象曰剝剝也柔變剛也

孟子於斯時也天下殆哉岌岌乎危而不安是剝

者之象 **左傳**今王室亂單旗劉狄剝亂天下壞而

必覆是剝之者之象故曰剝剝也 **詩**萋兮斐兮成

是貝錦彼譖人者亦已大甚 **又**營營青蠅止于樊

豈弟君子無信讒言小人之害君子在於變亂是

非柔變剛者言剛爲柔所變也

不利有攸往小人長也順而止之觀象也君子尙消
息盈虛天行也

詩尹氏大師維周之氏**又**皇父孔聖作都于向陰

之盛而得位故不日道長而直曰小人長也**大學**

長國家而務財用者必自小人矣小人之使爲國

家舊害並至雖有善者亦無如之何矣往之不利

非爲一身計亦知其勢之不可爲也**論語**陳力就

列不能者止順而止之之謂也**論語**季子然問仲

由冉求可謂大臣與子曰所謂大臣者以道事君不可則止曰然則從之者與子曰弑父與君亦不從也此所謂順而止之者聖人之辭嚴矣**論**北風其涼雨雪其雩惠而好我攜手同行觀象者陰盛之象也**論語**道之將行也與命也道之將廢也與命也**孟子**行或使之止或尼之行止非人所能也天也盈虛消息莫非天行**論語**君子哉若人尙德哉若人君子所尙有以知天道之本然矣

象曰山附於地剝上以厚下安宅

左傳山有朽壤而崩山附於地之象也是以爲剝

詩予曰有疏附以下親上曰附山附于地則以上

親下象故曰厚下 **坤**爲上爲德爲下爲民六十四

卦惟此象辭稱上蓋以上九一爻而言 **坤**正德利

用厚生養民所以厚下 **坤**公既定宅公其以予萬

億年敬天之休基命所以安宅 **坤**子仁天之尊爵

人之安宅也厚下安宅以仁爲本 **坤**民可近不可

下民惟邦本本固邦寧高以下爲基君以民爲本

厚下安宅所以防剝之道也

初六剝牀以足蔑貞凶

論下莞上簟乃安斯寢牀所以安身足又所以安

牀者**詩**式遏寇虐無俾正敗小人之剝君子必先

敗其正而使之不安**公羊傳**寢而不寐此剝牀以

足之蔑貞凶者即正敗之謂也

象曰剝牀以足以滅下也

禮記以足感路馬芻有誅滅下為犯上之漸感芻

之誅與剝牀之戒同其義矣坤之履霜者即此

六二剝牀以辨屺貞凶

辨 辨謂之茲竿謂之旒簪謂之第革中絕謂之
辨革中辨謂之拳辨者中分之處連牀制言之則
新革卽牀之薦也 **左傳** 辨等威牀有上下之分猶
位有尊卑之辨 **詩** 式遏寇虐無俾正反小人之制
君子必漸反其正而使之上下無辨 **左傳** 遠閒親
新聞舊小加大淫破義此剝牀以辨之蔑貞凶者
卽正反之謂也

象曰剝牀以辨未有與也

剝 剝喪元良賊虐諫輔與正爲雠未有與之義也

論語 鄙夫可與事君也與哉其未得之也患得之
既得之患失之苟患失之無所不至矣小人不可
爲緣未有與者聖人所以絕之也 **孟子** 不仁者可
與言哉安其危而利其菑樂其所以亡者不仁而
可與言則何亡國敗家之有陰柔無應是以無與
曰未有與者不忍陰邪之害正猶冀其可與又聖
人之不輕絕人也

六三剝之无咎

左傳 晉范氏之臣王生惡張柳朔言諸昭子使爲

柏人昭子曰夫非爾讎乎對曰私讎不及公好不廢過惡不去善義之經也臣敢違之三獨應上之陽不同乎羣小以害正剝之无咎者也

象曰剝之无咎失上下也

孟子在王所者長幼卑尊皆非薛居州也上下羣陰皆小人也**左傳**惡直醜正實蕃有徒失上下者不同乎四陰也

六四剝牀以膚凶

論語膚受之愬切身之害其象爲膚**左傳**殺孟陽

於牀不類見公之足於戶下弑之剝牀至膚則有

弑逆之患矣故曰凶

象曰剝牀以膚切近災也

大學好人之所惡惡人之所好是謂拂人之性菑

必逮夫身切近之災剝於陰之患也可不戒哉

六五貫魚以宮人寵无不利

周禮連行小蟲之屬注魚屬是貫魚也 **爾雅**鱗鱗

鱖婦注小魚也俗呼為魚婢江東呼為妾魚婢妾

之稱貫魚所以為宮人之象也 **禮記**天子立六宮

三夫人九嬪二十七世婦八十一御妻以聽天下
之內治以明章婦順五居尊位率羣陰以承一陽
是以宮人寵之象也 **左傳**齊侯多內寵如夫人者
六人以宮人寵則嫡庶之分明矣非私寵也 **周禮**
天官內宰以陰禮教六官以陰禮教九嬪以婦職
之灋教九御使各有屬以作二事正其服禁其竒
表展其功緒九嬪掌婦學之灋以教九御婦德婦
言婦容婦功各帥其屬而以時御敘于王所若此
者使之分職於內而附屬於外所以奉法謹而考

功勤无不利之義也。南有樛木葛藟之樂只。君子福履綏之。又。益斯羽詵詵兮宜爾子孫振振。兮皆言后妃能遠下而無嫉妒之心是以履福祿而宜子孫以宮人寵无不利其惟關雎之化乎。象曰以宮人寵終无尤也。

我思古人俾無訛兮秩然有分无尤之義莊姜之所以思古者此之謂也。左傳夫有尤物足以移人女之尤者匹嫡亂政其害至大。左傳女德無極婦怨無終日終无尤則占寵之利者亦終防剝之。

患此爻雖不言剝聖人之旨亦微矣

上九碩果不食君子得輿小人剝廬

論雅果不熟曰荒果與穀菜皆所以資食者論標

有梅其實七分標有梅其實三分以漸而落僅有

存者曰碩果碩果是當剝之時而有不剝也論標

吾豈匏瓜也哉焉能繫而不食不食之象如此霜

寒不侵朽蠹不蝕碩果之不食有能自存者在矣

論雅桃李醜核注核中有人亦謂之仁核在可以

復生卽生理也剝之終有復之機於碩果見之矣

周易引經通釋

卷三

三
鴻陰書屋

下之載上者與左傳衛文公元年革車三十乘季
年乃三百乘萬乘之國爲天子千乘之國爲諸侯
得與卽得衆之謂也左傳夏少康有田一成有衆
一旅祀夏配天不失舊物此君子之得與剝而必
復也上之覆下者左傳吾儕小人皆有闔廬以
避燥溼寒暑聚而託處小人之所仰也需受爵不
讓至于已斯亡此小人之剝廬終亦自剝也豈知
身之所庇哉

象曰君子得與民所載也小人剝廬終不可用也

詩匪風發兮匪車偈兮顧瞻周道中心怛兮民所
載者載舊之義也 **孟子**爲巨室則必使工師求大
木工師得大木則王喜以爲能勝其任也匠人斲
而小之則王怒以爲不勝其任矣况剝廬之小人
乎故曰終不可用 **書**予臨兆民懷乎若朽索之馭
六馬爲人上者奈何不敬必得與而後爲民所載
詩風雨攸除鳥鼠攸去君子攸芋必去其剝廬者
而後自安終明厚下安宅之義也

三三 震下
坤上

復亨出入无疾朋來无咎反復其道七日來復利有攸往

言歸思復復者復還之義 **卒**乃復終而復始

天道不可一日無陽復之所以亨也案文復從人

從日從彳從夂日者陽也彳者行也夂者止也說

文曰往來也是人之行止象日之往來曰反復其

道七日來復天行也其義已見於卦名矣 **禮記**天

地之道寒暑不時則疾復則陽之來入也陽之生

出也皆得其正是以无疾 **爾雅**十月為陽十月純

陰之月謂之陽月者陽無終盡之理陽之復生已
基於此**卦**歲亦陽止十一月而一陽生歲且更始
所以曰復亨也天道之復自陽始人道之復自心
始**孟子**孔子曰操則存舍則亡出入無時莫知其
鄉惟心之謂與孟子曰學問之道無他求其放心
而已矣存而不放是復亨而出入无疾之義也坤
卦西南得朋朋蓋指五陰隨陽言**論語**德不孤必
有鄰一陽既復必以類應陰雖朋來正其所以喪
朋也故曰无咎來復之後則陽之長者爲往矣**中**

庸道並行而不相悖陰往陽來是反復其道也卦

位內爻三外爻三先甲後甲先庚後庚先後皆日

三日象乎內外也卦之六爻周而復始此之七日

來復是也**禮記**三日齊七日戒散齊七日致齊三

日齊一之心亦以三日七日爲節是其義也**禮記**

仲夏之月日在東井昏亢中旦危中仲冬之月日

在斗昏辟中旦軫中自仲夏一陰之月至仲冬一

陽之月而復是七月也曰七日者月建之移皆以

日爲驗且尊陽也**孟子**伯夷大公辟紂聞文王作

與曰盍歸乎來一陽初生亂極復治之象知剝之不利有攸往則知復之利有攸往矣來復者天運之自然攸往者人事之當然也

彖曰復亨剛反

爾雅復反也復之亨由於剛之反 **福祿**來反反

之爲言還也 **孟子**湯武反之也修爲以復其性剛

反之義也

動而以順行是以出入无疾朋來无咎

左傳天有六氣陰陽風雨晦明分爲四時淫則生

疾陽動而復是以出入无疾**論語**一日克己復禮

天下歸仁焉爲仁由己而由人乎哉復則陰皆順

從乎陽是以朋來无咎動者靜中之動以順行者

中庸戒慎乎其所不睹恐懼乎其所不聞養其靜

之體正所以養其動之根也

反復其道七日來復天行也

周書惟一月既南至日短極基漸長微陽動于黃

泉陰慘于萬物日月俱起于牽牛之初右回而行

月周天起一次而與日合宿日行月一次周天歷

舍于十有二辰終則復始是謂日月權輿天之行

於復之時而見也 **孟子** 天之高也星辰之遠也苟

求其故千歲之日至可坐而致也已往之迹其運

有常天行之自然也五月天行至午陽伏而陰升

十一月天行至子陰伏而陽升凡歷七月日七日

者 **詩** 一之日觶發二之日栗烈日月亦可互言 **左**

傳 天以七紀故曰天行乾三之象曰反復道也天

行之健正於其復見之

利有攸往剛長也

禮記春作夏長仁也由生而長剛長之義如此剛

反在方復之初剛長在既復之後復之長卽可進

於乾**左傳**同復于父可以知復之義矣

復其見天地之心乎

中庸仁者人也**禮記**人者天地之心也天地以生

物爲心一陽之生故曰復其見天地之心也凡果

實之心皆曰仁亦曰人天地之心無時不在無物

不有於復而見之者**孟子**惻隱之心仁之端也羞

惡之心義之端也辭讓之心禮之端也是非之心

智之端也善端甚微所以勉人之擴充者復之義也
禮記人心惟危道心惟微惟精惟一允執厥中則危復則微一心之存亡千古之治亂關焉必精以察之一以守之中也者聖賢之心於是傳天地之心於是見

象曰雷在地中復先王以至日閉關商旅不行后不省方

禮記仲秋之月雷始收聲是雷在地中之象也至

仲冬之月一陽初生動於地中是復之義也

禮記

郊之祭也迎長日之至也日之始長陽之初反象

諸復也 **禮記** 仲冬之月日短至陰陽爭諸生蕩君

子齊戒處必掩身身欲寧去聲色禁者欲安形性

事欲靜以待陰陽之所定塗闕廷門闕此以助天

地之閉藏也是至日閉闕之義也 **周禮** 通四方之

珍異以資之謂之商旅農已收藏工已效功商旅

故特言之 **禮記** 仲夏之月闕市毋索仲秋之月易

闕市來商旅納貨賄以便民事凡舉大事毋逆大

數必順其時境上之門亦謂之闕商旅不行亦順

時之義也。書歲二月東巡狩肆覲東后十有一月
朔巡狩五載一巡狩羣后四朝十有一月卽一陽
之月舜始受禪而巡狩歲徧故有十一月省方之
典至五載四朝必順其時所以言后不省方旣言
先王又言后則后遵先王之道者說文解后爲繼
體之君其是之謂與

初九不遠復无祗悔元吉

論語不遷怒不貳過不遷而復之義也中庸回之
爲人也擇乎中庸得一善則拳拳服膺而弗失之

矣一陽之初卽一善之謂也論語言寡尤行寡悔

无至於悔之義也論語克己復禮爲仁善之長也

故曰元吉

象曰不遠之復以脩身也

大學自天子以至於庶人壹是皆以脩身爲本欲

修其身者先正其心如琢如磨者自脩也故曰不

遠之復所以脩身

六二休復吉

爾雅休美也復善爲美書作德心逸日休是自全

其美者大學其心休休焉其如有容焉人之彥聖
其心好之是容人之美者論語里仁爲美擇不處
仁焉得知二近初而能親仁是以曰休復吉

象曰休復之吉以下仁也

論語好仁者無以尙之仁者能好故曰以下仁論

語慮以下人初復於仁二能下之下人卽下仁之

謂也論語君子以文會友以友輔仁論仁卽下仁

之謂也論語曾子曰以能問於不能以多問於寡

有若無實若虛犯而不校昔者吾友嘗從事於斯

矣若曾子之於顏子可謂下仁者也

六三頻復厲无咎

論語子曰回也其心三月不違仁其餘則日月至焉而已矣若由求赤憲之徒皆頻復者也**孟子**存乎人者豈無仁義之心哉日夜之所息平旦之氣其好惡與人相近也者幾希其旦晝之所爲有梏亡之矣梏之反復則其夜氣不足以存常人頻復之厲者以此**孟子**人恒過然後能改是以无咎

象曰頻復之厲義无咎也

書一人三失頻復之所以厲也**論語**過則勿憚改
勿憚爲頻復者言之也**論語**聞義不能徙不善
能改是吾憂也日義无咎聖人重改過也

六四中行獨復

論語不得中行而與之中行中道而行也**禮記**其
特立獨行有如此者是獨復之義也**中庸**莫見乎
隱莫顯乎微故君子慎其獨也謹之於心是以能
見之於行也

象曰中行獨復以從道也

論語 子陳良楚產也悅周公仲尼之道北學於中國

北方之學者未能或之先也彼所謂豪傑之士也

羣陰之中獨應於陽是從道也自卦主一陽而言

論語 有朋自遠方來不亦樂乎道之願同乎人也

故曰朋來自爻之從陽而言**書**能自得師者王道

之獨切乎己也故曰獨復

六五敦復无悔

爾雅 敦勉也由勉以至於安是為敦復**左傳** 詩曰

比于文王其德靡悔心能制義曰度德正應和曰

莫照臨四方曰明勤施無私曰類教誨不倦曰長
賞慶刑威曰君慈和徧服曰順擇善而從之曰比
經緯天地曰文九德不愆作事無悔敦復无悔文
王以之**論語**仁者安仁五之敦復是也知者利仁
二之休復是也

象曰敦復无悔中以自考也

禮記中心安仁者天下一人而已矣五居尊位足
以當之**左傳**君子之行思其終也思其復也中以
自考之義也**禮記**考道以爲無失自考乃无悔之

貴也。左傳：民受天地之中以生，所謂命也。三之中行五之中，以自考，皆所謂見天地之心者。

上六迷復，凶。有災眚，用行師，終有大敗，以其國君凶。至于十年不克征。

醫：殷王受之迷亂，酗于酒德，迷而不復者，不知復也。故曰迷復。困：不思其反，反是不思，亦已焉哉。迷復之所以凶也。左傳：子大叔告子展曰：楚子不修其政德而貪昧於諸侯，以逞其願，欲久得乎周易有之。在復之頤曰：迷復凶，其楚子之謂乎。欲復其

願而棄其本復歸無所是謂迷復此正釋迷復之
義有災眚者左傳天火曰災又非日月之眚不鼓
此謫見於天象者也用行師終有大敗者左傳見
師之出而不見其入穀梁傳匹馬隻輪無反者敗
師之象也左傳鄢陵之戰晉筮之史曰吉其卦遇
復曰南國蹇射其元王中厥目國蹇王傷不敗何
待是以其國君凶也左傳子產曰陳亡不過十年
矣又子產曰吾不患楚矣汰而愎諫不過十年是
至於十年不克征也國語不過十年數之紀也天

之所棄不過其紀左傳劉康公曰不及十年原叔
必有大咎天奪其魄矣或過或不及凡言十年皆
極其數言之也此禍見於人事者也左傳敬始而
思終終無不復曰終有大敗至於十年不克征聖
人戒迷復之終猶未絕其望也

象曰迷復之凶反君道也

孟子欲爲君盡君道反之者不盡乎君道也孟子
道二仁與不仁而已矣迷復之戒如是書昏迷不
恭反道敗德迷者必反道也

三三 震下
乾上

无妄元亨利貞其匪正有眚不利有攸往

案无妄從亡從女孟子操則存舍則亡心之馳者
必至於云亡禮記男女人之大欲存焉欲之易者
莫先於好女動以人則妄動以天則无妄卦之所
以立名也中庸誠者天之道也誠之者人之道也
實理自然此无妄之義也書惟尹躬暨湯咸有一
德臣德同於君中庸周公成文武之德子德同於
父震與乾同德故亦曰元亨利貞孟子大人者言

不必信行不必果惟義所在誠必出於正故既曰
无妄又曰其匪正有眚也誠亦有不正者如論語
子路使門人爲臣敬師之誠也而失於詐左傳齊
拳強諫楚子臨之以兵愛君之誠也而近於逆論
語言忠信行篤敬雖蠻貊之邦行矣言不忠信行
不篤敬雖州里行乎哉不利有攸往之義也

彖曰无妄剛自外來而爲主于內動而健剛中而應
大亨以正天之命也其匪正有眚不利有攸往无妄
之往何之矣天命不祐行矣哉

書惟皇上帝降衷于下民若有恒性是剛自外來
而爲主於內之義孟子行吾敬故謂之內也又是
集義所生者非義襲而取之也我故曰告子未嘗
知義以其外之也內外之義孟子之說明矣論語
主忠信爲主於內誠之立也下言其所以行者孟
子今人乍見孺子將入於井皆有怵惕惻隱之心
動而健者无妄也中庸喜怒哀樂之未發謂之中
發而皆中節謂之和剛中而應者无妄也中庸天
命之謂性四德皆原於性道之大原出於天故曰

天之命也。孟子莫非命也。順受其正，知命者不立乎巖牆之下，受其正者，知其匪正，有眚也不立巖牆者，所以不利有攸往也。大學人之其所親愛而辟焉，之其所賤惡而辟焉，之其所畏敬而辟焉，之其所哀矜而辟焉，之其所敖惰而辟焉，之者有所偏，无妄之往則正矣。故曰何之。孟子存其心，養其性，所以事天也。殀壽不貳，脩身以俟之，所以立命也。故曰天命不祐行矣哉。

象曰：天下雷行，物與无妄。先王以茂對時育萬物。

禮記仲春之月雷乃發聲蟄蟲咸動啓戶始出季
春之月句者畢出萌者盡達雷之發聲衆物皆應
此天下雷行物與无妄之象也中庸不誠無物是
物皆與以无妄也詩時邁其邦昊天其子之薄言
震之莫不震疊敷天之下良時之對先王法之以
對時者也左傳爲溫慈惠和以效天之生殖長育
先王法之以育物者也孟子不違農時穀不可勝
食也斧斤以時入山林材木不可勝用也禮記樹
木以時伐焉禽獸以時殺焉皆對時而育物之義

也中庸惟天下至誠爲能盡其性能盡其性能
盡人之性能盡人之性能則能盡物之性能盡物之
性則可以贊天地之化育可以贊天地之化育則
可以與天地參矣无妄之義此章足以盡之

初九无妄往吉

此爻爲誠之主卽彖所謂无妄之往者書德惟一
動罔不吉无妄之往所以吉也

象曰无妄之往得志也

孟子至誠而不動者未之有也故曰得志大學所

謂誠其意者毋自欺也如惡惡臭如好好色此之謂自謙自慊卽得志之謂也

六二不耕穫不菑畲則利有攸往

禮記 耕而弗種種而弗耨耨而弗穫是由耕而穫

之序也 **爾雅** 一歲曰菑二歲曰新田三歲曰畲是

由菑而畲之序也 **書** 若農服田力穡乃亦有秋耕

而後穫 **周禮** 一易之地再易之地不易之地菑而

後畲是事之必然者也 **詩** 不稼不穡胡取禾三百

廛兮不稼不穡胡取禾三百困兮不耕而望穫不

苗而望畝是理之必不然者也。**孟子**必有事焉而勿正心勿忘勿助長也是盡其所當爲而無預期意外之望者也。**詩**三之日于耜四之日舉趾則利有攸往之謂也。**禮記**修禮以耕之陳義以種之講學以耨之攸往之利豈僅爲百畝之不易者言之哉

象曰不耕穫未富也

富如**孟子**非富天下也之富言非計其利而爲之。**禮記**仁者先難而後獲未富之義也。**禮記**禮之先

幣帛也欲民之先事而後祿也先財而後禮則民利無辭而行情則民爭故君子於有饋者弗能見則不視其饋易曰不耕穫不菑畲凶以此坊民民猶貴祿而賤行今經文無凶字此足以明未富之義矣

六三无妄之災或繫之牛行人之得邑人之災

書天作孽猶可違自作孽不可道匪正有眚自作之孽无妄之災天作之孽也 **禮記**牛則執紼所謂繫之牛也 **書**馬牛其風無敢越逐祗復之乃越逐

不復汝則有常刑竊牛馬者有刑行人逸其罰邑
人受其災矣**詩**有兔爰爰雉離于羅非意之災君
子惟修身以俟之

象曰行人得牛邑人災也

左傳牽牛以蹊人之田而奪之牛牽牛以蹊者信
有罪矣而奪之牛罰已重矣蹊田之罰猶有以自
致之邑人則所謂无妄之災也**論語**子謂公冶長
雖在縲紲之中非其罪也其邑人之謂乎

九四可貞无咎

大學意誠而后心正心正而后身脩可貞卽戒其
匪正也无咎則不至有咎矣

象曰可貞无咎固有之也

大學心有所忿懣則不得其正有所恐懼則不得
其正不得其正者非固有也**孟子**仁義禮智非由
外鑠我也我固有之也此卽无妄之義**中庸**誠之
者擇善而固執之者也固有者在天葆其固有者
亦由乎人也

九五无妄之疾勿藥有喜

左傳天有六氣淫生六疾陰淫寒疾陽淫熱疾風淫末疾雨淫腹疾晦淫惑疾明淫心疾**周禮**四時皆有癘疾春時有疇首疾夏時有痒疥疾秋時有瘧寒疾冬時有嗽上氣疾凡疾皆由於人曰无妄者**論語**子疾病子路請禱子曰丘之禱久矣非自致也**周禮**凡藥以酸養骨以辛養筋以鹹養脉以苦養氣以甘養肉以滑養竅有藥所以治疾曰勿藥者**論語**子之所慎齊戰疾慎之於未疾之先即勿藥之喜也**孟子**有人於此其待我以橫逆則君

子必自反也我必不仁也必無禮也此物奚宜至哉其自反而仁矣自反而有禮矣其橫逆由是也君子必自反也我必不忠自反而忠矣其橫逆由是也君子曰此亦妄人也已矣又何難焉妄人之來无妄之疾也終以无妄待之勿藥有喜之義也无妄之疾與无妄之災同九五中正以處尊位謂苗民逆命帝乃誕敷文德七旬有苗格此虞帝之勿藥有喜也謂多方爾乃屢迪不靜我惟時其教告之此周王之勿藥有喜也

象曰无妄之藥不可試也

書若藥弗瞑眩厥疾弗瘳此藥之可試者也 **論語**

康子饋藥孔子曰丘未達不敢嘗此藥之不可試者也 **左傳**許悼公瘡飲大子止之藥卒書曰弑其君君子曰盡心力以事君舍藥物可也勿藥之義所關不綦重哉

上九无妄行有眚无攸利

左傳天災流行何國蔑有行有眚之義也故不曰 **匪正** **孟子**又極之於其所往處上而无可之也故

祇曰无攸利

象曰无妄之行窮之災也

家語 匪兇匪虎率彼曠野是无妄之行也 **論語** 衛

靈公問陳於孔子明日遂行在陳絕糧子路慍見

曰君子亦有窮乎子曰君子固窮小人窮斯濫矣

知道之窮者則亦不以爲災矣

三三 乾下
艮上

大畜利貞不家食吉利涉大川

畜名義解見小畜 **詩** 蓄兮蔚兮南山朝隴山之所

畜皆天之氣故曰大畜**禮記**孝也者畜也順於道

不逆於倫是之謂畜畜止畜養二義皆見於此忠

孝一原畜君之義固同之也風主散故其畜者小

而亨山主止故其畜者大而利貞**論語**崇德脩慝

辨惑遏欲以存理利貞之義也不家食吉者**孟子**

與食天祿是也利涉大川者**書**弘濟于艱難是也

皆明健之德也**禮記**事君大言入則望大利小言

入則望小利故君子不以小言受大祿不以大言

受小祿易曰不家食吉此可以知事君之義

象曰大畜剛健篤實輝光日新其德

孟子可欲之謂善有諸已之謂信充實之謂美充

實而有光輝之謂大此所謂大畜之德也剛健爲

乾體篤實爲艮體日輝光者**中庸**君子之道闇然

而日章剛健篤實之所畜而發也**大學**湯之盤銘

曰苟日新日日新又日新是謂日新其德**書**德曰

新萬邦惟懷畜德之大必有以及於人也

剛上而尚賢能止健大正也

孟子惟大人爲能格君心之非君仁莫不仁君義

莫不義君正莫不正一正君而國定矣剛上而尙
賢者大人也仁義之君能尙賢以天在山下言能
格君心之非者止健也賢者以仁義格君以山在
天上言正君而國定利貞之謂也是以曰大正大
畜之義此章足以盡之

不家食吉養賢也

詩適子之館兮還予授子之粢兮不家食所以爲
養賢**書**惟后非賢不乂惟賢非后不食故尙賢必
有以養賢也

利涉大川應乎天也

書 夢帝賚予良弼若濟巨川用汝作舟楫有大德者有大任應乎天之義也

象曰天在山中大畜君子以多識前言往行以畜其德

爾雅 山有穴爲岫 天光所入後世謂之洞天即天

在山中之象 **大戴禮** 土積成山風雨興焉形之成

者高則氣之積者厚所以爲大畜 **論語** 多聞闕疑

慎言其餘多見闕殆慎行其餘多識前言往行也

書學于古訓乃有獲事不師古以克永世匪說攸
聞前言往行之所以畜德也 **大戴禮**山爲積德所
以畜德取象於山也 **禮記**博聞強識而讓敦善行
而不怠謂之君子是畜德之義也

初九有厲利已

論語已而已而今之從政者殆而見危殆而當止
所謂有厲利已也 **孟子**於不可已而已者無所不
已也可已而不已則亦卽於危矣

象曰有厲利已不犯災也

中庸人皆曰予知驅而納諸罟獲陷阱之中而莫之知辟也是犯災也不知止者也
論語邦無道免於刑戮是不犯災也知止者也

九二與說輶

周禮加軫與鞮焉鞮者伏兔車軸縛輶之謂也

傳陽虎盡借邑人之車鋏其軸麻約而歸之使之

車不能行是其象也說輶者自止不進之象

象曰與說輶中无尤也

論語可以仕則仕可以止則止止而得中故曰无

尤論 言寡尤行寡悔檢身之无尤 尤論 語不怨天
不尤人知命之无尤惟畜德者能之也

九三良馬逐利報貞曰閑與衛利有攸往

周禮校人辨六馬之屬種馬一物戎馬一物齊馬

一物道馬一物田馬一物駑馬一物凡頒良馬而

養乘之駑馬三良馬之數駑馬以上皆良馬也 論

語驥不稱其力稱其德也驥為良馬逐者馬之力

貞者馬之德也 周禮天子十二閑邦國六閑家四

閑馬之有閑所以防止之義也 周禮閑習也 周禮

物四驥閑之維則亦所以閑習之義也**詩**戎車既

安如輕如軒四牡既佶既佶且閑是日閑與衛者

也**左傳**僕臣與與臣臺與者同車之僕也**左傳**行

則備一夕之衛**又**秦康公送晉公子多與之徒衛

衛者從車之徒也閑於與衛則馬之閑習者也**左**

傳古者大事必乘其產生其水土而知其人心安

其教訓而服習其道惟所納之無不如志此閑與

衛者之利有攸往也**詩**君子之馬既閑且馳逐則

利乎艱貞閑則利乎攸往能行而後能止能止而

後能行也。○謙○秉心塞淵騷牝三千。○又思無疆思馬
斯臧馬之碩大蕃滋由於人之剛健篤實此良馬
之利有攸往本於畜德之義也

象曰利有攸往上合志也

○周○禮進則與馬謀退則與人謀合志之謂也上謂

上九天衢在上可以利往。○○吾爲之範我馳驅

終日不獲一爲之詭遇一朝而獲十詩云不失其
馳舍矢如破我不貫與小人乘請辭是上合志之
義可於此明之矣

六四童牛之牯元吉

爾雅 犝牛注無角牛即童牛也 **書** 今惟淫舍牯牛

馬牯所以禁牛馬者不可舍也 **周禮** 封人飾其牛

牲設其楅衡施於牛角以止觸者牯之謂也 **詩** 彼

童而角實虹小子童牛則未有角也無角而先止

之 **禮記** 禁於未發謂之豫是其義也是以元吉

象曰六四元吉有喜也

詩 爾牛來思其耳濕濕盡物之性故有喜 **孟子** 仁

民而愛物仁心為質元吉之喜也

六五豮豕之牙吉

爾雅豕子豬豮豮也幼皆少者之名小豬也**左傳**

樂正后夔生伯封實有豕心貪惓無厭忿類無期

謂之封豕封豕豕之大者**左傳**既定爾婁豬盍歸

吾艾豶艾豶豕之雄者豕之有牙長則難制幼小

之時防之與特同意童牛曰特指其物豮豕曰牙

明其義卦義主畜故吉凡物之爲害者惟角與牙

以其剛也**詩**誰謂雀無角何以穿我屋誰謂鼠無

牙何以穿我墉雀有喙而無角鼠有齒而無牙無

角無牙者尙防其害況有角有牙者乎及其角與牙之未成而畜之此可以明牝牛豮豕之義矣

象曰六五之吉有慶也

孟子如追放豚旣入其苙物得所歸故有慶**禮記**

人喜則斯陶陶斯咏咏斯猶有喜自其身言之**書**

一人有慶兆民賴之有慶自其廣被者言之也**禮**

記聖人作則必以天地爲本以陰陽爲端以四時爲柄以日星爲紀月以爲量鬼神以爲徒五行以爲質禮義以爲器人情以爲田四靈以爲畜龍以

爲畜故魚鮪不滄鳳以爲畜故鳥不獮麟以爲畜
故獸不狘龜以爲畜故人情不失自天地鬼神之
事而終之以四靈爲畜以明咸若之象大畜之取
象於牛馬豕者卽其義也**書**百獸率舞鳳凰來儀
大同大順之世也有喜有慶其以是哉

上九何天之衢亨

爾雅四達謂之衢大道也謂之天衢者**書**王道蕩
蕩王道平平是也日何天之衢者**詩**何天之休何

天之龍是也所以爲亨之義也畜極而通其象如

此因四之良馬攸往而言任重致遠以利天下者也
孟子有不被堯舜之澤者若已推而內之溝中
其自任以天下之重如此是何天之衢者也

象曰何天之衢道大行也

孟子行天下之大道此其義也 **孟子**雖大行不加

焉道之大行非為身也

三三 震下
艮上

頤貞吉觀頤自求口實

爾雅東北隅謂之宦取陽氣頤養之義伏義八卦

震在東北文王八卦艮在東北皆陽方也所以山
雷爲頤 **禮記**頤鬻垂拱頭臨前垂頤如屋雷雷爲
屋簷故頤象之案文從頁從臣頁象首臣象頤此
象之近取諸身者 **左傳**穀也食于難也收于穀也
豐下必有後於魯國頤下爲頤頤能食物養之義
也 **禮記**百年日期頤人之終身皆賴於養於百年
著其義者養之克終貞吉之謂也 **論語**割不正不
食養以正爲吉即小可以觀大也觀頤者統觀養
之爲美 **孟子**由是觀之則君子之所養可知矣是

其吉也。[困]克岐克嶷以就口食自求口實頤之正義也。[困]予恐來世以台爲口實言以事爲實食以物爲實故亦曰口實也。

象曰頤貞吉養正則吉也觀頤觀其所養也自求口實觀其自養也。

[孟子]養其大者爲大人養其小者爲小人所以考其善不善者於己取之而已矣是養正則吉之義也。[孟子]我善養吾浩然之氣又養心莫善於寡欲皆養德也是觀其所養也。[禮記]飲以養陽食以養

陰皆養生也是觀其自養也 **圖**不稼不穡不稽胡取禾

三百億兮不狩不獵胡瞻爾庭有縣特兮彼君子

兮不素食兮此自求曰實觀其自養之義 **孟子**公

孫丑曰君子之不耕而食何也孟子曰其君用之

則安富尊榮其子弟從之則孝弟忠信不素餐兮

孰大於是是不虛食之義所以不曰口食而曰口

實君子之厲志如此而養德之義在其中矣 **禮記**

君者所養也非養人者也此但言君之大體通觀

卦義養德者求養於上下是取以爲助也則吉養

生者求養於上下是失其固有也則凶知此則卦
內視由顛拂之義皆曉然矣

天地養萬物聖人養賢以及萬民頤之時大矣哉

禮記天有生地有養是天地養萬物也**禮記**堯之

於舜也百官牛羊倉庫備以養舜於畎畝之中是

聖人養賢也**禮記**養三老五更於大學執醬而饋

執爵而酌亦養賢之義也**禮記**老有所終幼有所

長矜寡孤獨廢疾者皆有所養也是養萬民也**禮記**

子勞心者治人勞力者治於人治於人者食人治

人者食於人是養賢以及萬民之義也 **禮記**春食

麥與羊夏食菽與雞秋食麻與犬冬食黍與彘食

齊視春時羹齊視夏時醬齊視秋時飲齊視冬時

此類皆養生之隨乎時也 **禮記**春饗孤子秋食耆

老 **禮記**不違農時穀不可勝食數罍不入洿池魚

鼈不可勝食此類皆養人之隨乎時也 **禮記**日長

至止聲色毋或進薄滋味毋致和節者欲定心氣

日短至去聲色禁者欲安形性皆養德之隨乎時

也顯之道無所不在故日顯之時大

象曰山下有雷頤君子以慎言語節飲食

頤 殷其雷在南山之下 此山下有雷之象山蘊育

於上雷發動於下卽頤之義也以象言之山止於

上雷動於下上下二陽中含四陰 **頤** 輔車相依

唇亡齒寒艮止爲輔震動爲車上下二陽爲唇中

之四陰爲齒可以見頤之象也 **頤** 好言自口莠言

自口言語自口出是以貴慎 **頤** 惟口出好與戎慎

之義也 **頤** 子 飢者甘食渴者甘飲飢渴害之也飲

食自口入昇以貴節 **頤** 以小人腹爲君子之

心屬厭而已節之義也 **論語**鄉黨一篇記孔子食不厭精膾不厭細皆曰不多食又曰食不語寢不言飲食言語聖人得頤之道其義莫備於此

初九舍爾靈龜觀我朵頤凶

禮記麟鳳龜龍謂之四靈故曰靈龜 **大戴禮**食氣

者神明而壽龜食氣之物舍爾靈龜昧乎養之正也朵頤如華朵之下垂 **左傳**子公之食指動染指

於鼎嘗之而出有欲炙之色所謂觀我朵頤者也

孟子夫人幼而學之壯而欲行之王曰姑舍女所

學而從我舍爾觀我是舍理從欲之謂也 **左傳** 籍

雲氏有不才子貪于飲食冒于貨賄天下之民以

比三凶謂之饕餮 **象** 頤之所以爲凶也 **孟子** 理義

之悅我心猶芻豢之悅我口 **又** 言飽乎仁義也所

以不願人之膏粱之味也 理義仁義者靈龜之謂

也 芻豢膏粱者 **象** 頤之謂也 君子其知所取舍哉

象曰觀我 **象** 頤亦不足貴也

孟子 飲食之人則人賤之矣故不足貴 **孟子** 齊人

有一妻一妾而處室者良人出則必饜酒肉而後

反卒之東郭墦間之祭者乞其餘不足又顧而之
他此其爲饜足之道也朶頤之賤必至於是觀頤
之義在初爻爲深切著明者**孟子**嘑爾而與之行
道之人弗受蹴爾而與之乞人不屑也**禮記**黔敖
爲食於路餓者蒙袂輯履曰嗟來食曰予唯不食
嗟來之食以至於斯也終不食而死是賤者且以
朶頤爲恥而人可不思自有之良貴哉

六二顛頤拂經于丘頤征凶

詩顛之倒之顛頤謂求養於初也**周禮**經涂九軌

經爲道之常者 **孟子** 經德不回非以千祿也求養
則爲拂經 **爾雅** 途出其前戴丘丘爲道之迂者拂
經于丘頤謂求養於上也六二以陰求二陽之養
而皆非其應求養於下而不以道 **左傳** 浚我以生
是也求養於上而不以道 **孟子** 紆兄之臂而奪之
食是也是皆行之有凶者何以爲頤

象曰六二征凶行失類也

失類卽無應之謂統曰六二征凶蓋兼頤頤子丘
頤而言之 **孟子** 今之諸侯取之於民也猶禦也是

類頤者**又**孟子謂樂正子曰子之從於子敖來徒
舖啜也是丘頤者若北豈非失類之行乎

六三拂頤貞凶十年勿用无攸利

此文與上有正應故不曰拂經而曰拂頤**孟子**陳

仲子與之齊國而弗受是舍簞食豆羹之義也人

莫大焉亡親戚君臣上下言拂乎頤之理正而亦

凶也**左傳**一薰一蕕十年尚猶有臭與正相反極

其數以言之不能變也故曰十年勿用**孟子**充仲

子之操則蚓而後可也不中不正之行於己勿用

於人亦無所利也

象曰十年勿用道大悖也

三本有應於上故曰貞陰柔而不中正行之反乎
常者故曰拂**孟子**以母則不食以妻則食之以兄
之室則弗居以於陵則居之是拂人之性者也故
曰道大悖**大學**言悖而出者亦悖而入貨悖而入
者亦悖而出悖之爲義如是知其道者其惟慎言
語節飲食之君子乎**禮記**飲食男女人之大欲存
焉屯二之象曰十年乃字反常也此之象曰十年

勿用道大悖也事之不近人情者必爲奸慝對觀而明其義矣

六四顛頤吉虎視眈眈其欲逐逐无咎

詩于嗟乎騶虞毛傳騶虞白虎黑文不食生物者

也羗之靈者以不食爲養虎之仁者亦以不食爲

養以象同德而求其養**禮記**仲冬之月虎始交虎

不再交能節欲也**孟子**虎負嵎虎不回顧眈眈說

文視近志遠也**書**禹曰皐陶邁種德德乃降黎民

懷之帝念哉念茲在茲釋茲在茲名言茲在茲允

出茲在茲惟帝念功禹與皋陶同德念茲釋茲卽
耽耽逐逐之義帝念民懷所謂聖人養賢以及萬
民其義具於此矣矣**中庸**兄弟既翕和樂且耽視
耽耽言視之專**左傳**諸侯逐進狎主齊盟欲逐逐
言欲之繼**大學**顧諟天之明命耽耽之視常目在
之也**論語**欲仁而得仁又焉貪逐逐之欲欲而不
貪也懷德如此是以无咎

象曰顛頤之吉上施光也

禮記上酌民言則下天上施下應於初以廣其施

此卽養賢以及民者上施之所以光也**左傳**陳氏
厚施於民**又**樂氏好施民多懷之此則施之不光
者矣

六五拂經居貞吉不可涉大川

書德惟善政政在養民養民者政之經也不能養

人曰拂經**國語**王者居九畝之田收經入以食兆

民取民以養亦謂之經故曰居貞吉**孟子**許行曰

滕君則誠賢君也未聞道也賢者與民並耕而食
糞殮而治今也滕有倉廩府庫則是厲民而以自

養也惡得賢許行之所謂厲民是拂經也堯以不
得舜爲己憂舜以不得禹皋陶爲己憂夫以百畝
之不易爲己憂者農夫也孟子之言所謂能養賢
以及民者是居貞吉也**孟子**子產聽鄭國之政以
其乘輿濟人於溱洧孟子曰惠而不知爲政君子
平其政行辟人可也焉得人人而濟之爲政之體
不尙私恩小惠况居尊乎此足以明不可涉大川
之義**雷**自用則小故五之涉川不可用而用上以
涉川則利也

象曰居貞之吉順以從上也

左傳以欲從人則可以人從欲鮮濟順以從上得

養賢及民之正也二五皆曰拂經二之凶觀自養
五之吉觀所養也二在動體之中故征凶五在止
體之中故居吉

上九由頤厲吉利涉大川

爾雅由自也由頤養之自我也**書**若顛木之有由

顛木末曰顛木本曰由逆之曰顛頤剝求於下也

順之曰由頤正而從上也**孟子**禹思天下有溺者

由己溺之也。禮思天下有飢者由己飢之也。又伊尹思天下之民匹夫匹婦有不與被堯舜之澤者，若己推而內之溝中，由頤之厲其義如此。聖人思飢溺之由而天下皆被其澤，厲之所以吉也。書若濟巨川，用汝作舟楫，由頤之吉，卽所以利涉大川之義也。

象曰：由頤厲吉，大有慶也。

孟子：后稷教民稼穡樹藝五穀，五穀熟而民人育。

上九得六五之任，以養民慶之所以大也。圖黍稷。

稻梁農夫之慶得其所養故大有慶**孟子**以善養人然後能服天下由順之慶蓋如是

三三 巽下兌上

大過棟橈利有攸往亨

園揚之水不流束楚水之激者則不及澤之滅木

所以為大過業過之文從彳從冫冫行近於禍者

大過者陽之過也小過者陰之過也**論語**加年學

易可以無大過矣是以大過為有失者也**孟子**古

之人所以大過人者無他焉善推其所為而已矣

是以大過爲有爲者也卦象兼此二義爾雅棟謂之桡屋脊也**周禮**已敝則橈橈之言曲也禮記梁木其壞乎棟橈之象是大過之有敗也**孟子**故將大有爲之君必有所不召之臣其尊德樂道不如是不足與有爲也利有攸往之義是大過之有爲也故亨

彖曰大過大者過也

中庸賢者過之不肖者不及也知者過之愚者不及也賢知之過皆近於陽是大者過之義也

棟橈本末弱也

大學物有本末案文木之一陽在下為本一陽在

上為末初上皆陰故曰本末弱也**在**偏夫能固位

者必度於本末而後立衷焉不知其本不謀知本

之不支弗強**又**國家之立也本大而末小是以能

固天子建國諸侯立家卿置側室大夫有貳宗士

有隸子弟庶人工商各有分親皆有等衰是以民

服事其上而下無覬覦今晉甸侯也而建國本既

弱矣末之弱者常也本之弱者變也本末皆弱此

棟之所以橈也。書六極六曰弱極而曰弱卽大過之義也。本末弱則中亦不支。國語天之所廢不可支也。此棟橈之謂也。

剛過而中巽而說行利有攸往乃亨

過而得中必以和順之道行之。剛不剛不柔敷政優優是其義也。左傳慢則糾之以猛殘則施之以寬所以損過就中也。書若作室家既勤垣墉惟其塗墍茨若作梓材既勤樸斲惟其塗丹雘既曰棟橈又曰利有攸往不可聽其壞而不支也。論語危

而不持顛而不扶則將焉用彼相矣故曰利有攸
往乃亨也

大過之時大矣哉

孟子五百年必有王者興其間必有名世者由周
而來七百有餘歲以其數則過矣以其時考之則
可矣大過之時必有大過之材以濟之大哉之義
惟孟子足以知之惟孟子足以當之

象曰澤滅木大過君子以獨立不懼遯世无悶

書洪水滔天浩浩懷山襄陵予乘四載隨山刊木

澤過於山 澗木之象 其過非常 是為大過 **孟子** 水

搏而躍之 可使過顛 激而行之 可使在山 過亦有

由於人力者 君子觀象而知戒也 **中庸** 中立而不

倚強哉 矯獨立之義也 **論語** 勇者不懼 所以獨立

也 **中庸** 君子依乎中庸 邇世不見知而不悔 无悶

之義也 **禮記** 儒行其特立獨行 有如此者 皆大過

人之德也

初六 藉用白茅 无咎

儀禮 士虞禮 饌黍稷二敦于階間 西上 藉用葦 注

藉猶薦也藉之為義承乎下也 **禮記** 縮酌用茅故

曰藉用 **左傳** 包茅不入王祭不共無以縮酒祭祀

之用有誠敬純潔之意故无咎

象曰藉用白茅柔在下也

禮記 有以下為貴者至敬不壇掃地而祭敬慎以

將事此柔在下之義也

九二枯楊生稊老夫得其女妻无不利

詩 隰有楊下濕所生 **爾雅** 楊蒲柳澤中之木也澤

以酒木始過而澤則為滅終過而不澤則為枯故

曰枯樹猶有澤焉故曰生梯生華也梯王弼謂之秀虞翻曰稚其說為近程傳謂梯為根朱子從之

太禮夏小正正月柳稊稊即旁根之再發者

傳絕其根本勿使能殖有根則其生不絕老夫女

妻猶可生育故取根之義為正

詩苞有三蘖所謂

稊也

孟子

萌蘖之生所謂生也

書

若顛木之有由

蘖而後生稊之義也

禮記

宗子雖七十無無主婦

七十猶娶是老夫得女妻之義也

國語

句踐命壯

者無取老婦老者無取壯妻皆取廣育之義曰无

不利者以其生理未絕也

象曰老夫女妻過以相與也

家語哀公問曰禮男必三十而有室女必二十而有夫也不已晚哉孔子曰夫禮言其極不是過也

老夫女妻故曰過以相與非正應者為過九二之與上六曰女妻兌之體少女也九五之與初六曰老婦巽之體長女也老夫老婦是以皆象諸大過九三棟橈凶

傳子產謂子皮曰子於鄭國棟也棟折榱崩倚

將厭焉棟喻大臣之任過剛則撓所以凶也

左傳

末大必折三在上卦之末重剛不中故有撓象

象曰棟撓之凶不可以有輔也

爾雅 宋廂謂之梁其楹謂之稅闕謂之榱桷謂之

椽桷謂之椽直而遂謂之閎直不受檐謂之交檐

謂之檣皆所以輔棟者剛而獨任則不可以有輔

處棟梁之任者其可無羣材之助哉 **國語** 直不輔

曲棟之榱也是以無輔 **論語** 朽木不可雕也棟撓

之凶其質先不足輔矣

九四棟隆吉有宅吝

國語不厚其棟不能任重重莫如國棟莫如德棟

之所以貴乎隆也

爾雅釋山宛中隆山之中起者

爲隆棟之在中而起亦有隆象 **孟子**爲巨室則必

使工師求大木工師得大木則王喜以爲能勝其
任也是棟隆之吉也匠人斲而小之則王怒以爲
不勝其任矣是有它之吝也 **詩**如彼築室于道謀
是用不潰于成戒有它之吝而專其任也

象曰棟隆之吉不橈乎下也

詩如竹苞矣如松茂矣言下之固而上之密也不
橈乎下則棟愈隆而吉矣橈卽指下卦三爻而言
不橈正其可以有輔之義與之相反**大學**人之有
技若己有之人之有技媚嫉以惡之棟隆棟橈之
分其以此也哉**禮記**中屋履危注危棟上也橈則
凶隆則吉其義所以危矣

九五枯楊生華老婦得其士夫无咎无譽

爾雅木謂之華華以喻其貌也**左傳**華而不實故

有老婦士夫之象**禮記**男子三十而娶女子二十

而嫁夫長於婦其常也婦長於夫其變也況過時之甚乎**國語**人皆集於苑已獨集於枯女妻士夫皆集枯者也是以象諸枯楊**詩**桑之未落其葉沃若桑之落矣其黃而隕士之耽兮猶可說也女之耽兮不可說也桑之黃隕卽老婦枯楊之謂无咎猶可說之謂无譽不可說之謂矣

象曰枯楊生華何可久也老婦士夫亦可醜也

詩有女同車顏如舜華朝生暮落華不可恃何可久之義也**左傳**晉公子謂季隗曰待我二十五年

不來而後嫁對曰我二十五年矣又如是而嫁則
就木焉不久之謂也 **詩**彼狡童兮不與我言兮又
子不我思豈無他士狂童之狂也且有以知可醜
之義矣大過之象皆取乎木 **詩**方斲是虔松栢有
榑旅楹有閑棟待斧斤而成以兌金乘巽木三四
所以爲棟也 **詩**其檉其楛其蓄其翳河柳近澤而
雙則枯以兌澤過乎巽木二五所以爲枯楊也

上六過涉滅頂凶无咎

爾雅顛頂也在上曰頂 **詩**匏有苦葉濟有深涉深

則厲淺則揭不量深淺此過涉之象也 **孟子** **墨子**

兼愛摩頂放踵利天下爲之爲人忘己此滅頂之

象也過涉滅頂之凶皆有咎故又以无咎明之 **論語**

子志士不忘在溝壑勇士不忘喪其元此過涉滅

頂之義也 **論語**志士仁人無求生以害仁有殺身

以成仁盡此道者凶而无咎

象曰過涉之凶不可咎也

左傳狼曠曰勇則害上不登於明堂馳秦師死焉

君子謂狼曠於是乎君子此過涉之不可咎也 **論語**

語比干諫而死子曰殷有三仁焉**公羊傳**孔父可謂義形於色矣仁義之行有不得不過者故曰不可咎初上二爻爲本末之弱者初曰藉用白茅**書**不矜細行終累大德謹小以爲任重之基此能慎其弱也上曰過涉滅頂**論語**三軍可奪帥也匹夫不可奪志也自反而無退避之義此能忘其弱也皆以弱爲強也雖柔必強其義如此

三三
坎下
坎上

習坎有孚維心亨行有尚

禮記祭月於坎象水之義也案坎之為文從土從

欠土欠其中則水入之是陷之義也**爾雅**小鳥謂

之坎亦取其中容水之意謂之習者水之流行不

休**論語**子在川上曰逝者如斯夫不舍晝夜此習

坎之義也習之文從羽**禮記**鷹乃學習鳥之數飛

為習水之數流亦為習也坎德中陷而坎象中實

孟子人無有不善水無有不下有孚之義也一陽

在中為心**書**啟乃心沃朕心心亨之義也**詩**汎汎

楊舟緇纒維之心之所以亨亦有維持之義**禮記**

拱而尙右拱而尙左行之所向爲尙 **書** 決九川距
四海濬畎澮距川水之行有尙也 **論語** 知者樂水
知者動知者樂水者坎之體樂者心亨動者行有
尙也

象曰習坎重險也

孟子 如水益深重險之謂也象之言習者本然之

體象之言習者當然之功 **書** 帝曰湯湯洪水方割

有能俾乂兪曰於鯀哉岳曰試可乃已大難之治

必須更試卽習坎之義坤之不習以其順坎之習

以其險也

水流而不盈行險而不失其信

孟子原泉混混不舍晝夜盈科而後進放乎四海

盈而後進所以流而不盈也必放乎海所以行險

而不失其信也**孟子**流水之爲物也不盈科不行

君子之志於道也不成章不達觀水之術學聖之

道也

維心亨乃以剛中也行有尙往有功也

書人心惟危道心惟微惟精惟一允執厥中罔陷

於陰則危而微一陽在中剛中之謂也所謂精一
者是已 **孟子** 禹之行水行其所無事也順其自然
所以有功 **書** 聲教訖于四海告厥成功此往有功
之義也

天險不可升也地險山川丘陵也王公設險以守其
國險之時用大矣哉

論語 猶天之不可階而升也無形之險也 **書** 封十

有二山濬川 **爾雅** 一成爲敦丘再成爲陶丘再成

銳上爲融丘三成爲崑崙丘東陵風南陵息慎西

陵威夷中陵朱勝北陵西隃雁門有形之險也天

險地險皆自然之險也**周禮**夏官司險掌九州之

圖以周知其山林川澤之阻而達其道路設國之

五溝五涂而樹之林以為阻固皆有守禁而達其

道路國有故則藩塞阻路而止行者以其屬守之

掌固掌脩城郭溝池樹渠之固頒其士庶子及其

衆庶之守凡國都之竟有溝樹之固郊亦如之若

有山川則因之是王公設險以守其國因自然之

險以成人為之險者也**左傳**四嶽三塗陽城大室

荆山中南九州之險是不一姓恃險不可以爲固也此自然之險不足恃也**孟子**域民不以封疆之界固國不以山谿之險此人爲之險不足恃也**詩**謂天蓋高不敢不局謂地蓋厚不敢不踏險有時而用而用又有在險之外者故曰險之時用大

象曰水洊至習坎君子以常德行習教事

詩如川之方至以莫不增水洊至之象也**爾雅**仍

飢爲荐再也洊與荐同義**禮記**所習必有業所以

常德行也**周禮**六德知仁聖義忠和六行孝友睦

婦任恤師氏至德以為道本敏德以為行本孝德

以知道惡孝行以親父母友行以尊賢良順行以

事師長皆德行之有常者習之於已者也 **禮記** 命

入學習舞入學習吹習射上功習鄉上齒皆所以

習教事也 **書** 百姓不親五品不遜敬敷五教在寬

教事之宜習者習之於人者也

初六習坎入于坎窞凶

論語 性相近也習相遠也 習亦有不善者卦德之

習日心亨習於善也爻辭之習日入坎習於惡也

困非天之降材爾殊也其所以陷溺其心者然

也是入于坎窞也故凶 **左傳**王遂出及坎欲地名

亦象其窪下也 **禮記**小人溺於水君子溺於口大

人溺於民皆在其所褻也夫水近於人而溺人德

易狎而難親也易以溺人口費而煩易出難悔易

以溺人夫民閉於人而有鄙心可敬不可慢易以

溺人故君子不可以不慎也褻而易溺不止於水

皆習坎入坎之戒也 **論語**君子上達小人下達心

亨行有尚則上達矣習坎入坎窞則下達矣皆在

慎習之始故於初爻著之

象曰習坎入坎失道凶也

書伊尹曰茲乃不義習與性成予弗狎于弗順大

甲曰欲敗度縱敗禮以速戾于厥躬是失道之凶

由於習也 **左傳**子服昭伯曰晉公室其將遂卑矣

君幼弱六卿彊而奢傲將因是以習習實為常能

無卑乎道之常者可習失道則不可常者也故凶

九二坎有險求小得

詩戰戰兢兢如臨深淵如履薄冰此所謂坎有險

者在險之中也。[詩]如彼泉流無淪胥以敗。[詩]若涉淵水予惟往求朕攸濟。皆在險中而求得之義也。日小得者。[家語]涓涓不息流為江河。矜細行也。象曰求小得未出中也。

[詩]泉之竭矣不云自中未出者二居坎體下卦之中君子不為險困。[詩]感沸檻泉維其深矣心之憂矣寧自今矣未出中而求小得即有孚心亨之義。六三來之坎坎險且枕入于坎窞勿用。

[爾雅]之往也下坎往而上坎來故日來之坎坎。[詩]

坎坎伐檀兮用力之聲亦取勞卦之義此其象也
來往皆險則難避**詩**進退維谷來之坎坎之謂也
前後皆險則不安**詩**輾轉伏枕險且枕之謂也如
是則入險而已**左傳**有淖於前陷於淖入於坎窞
之謂也初曰習坎入于坎窞**中庸**小人行險以徼
幸重險之下迷而不復**孟子**從流下而忘反謂之
流從流上而忘反謂之連是其人也故直斷之曰
凶三日險且枕入于坎窞**詩**逢此百憂尙寐無覺
重險之中不能自遣**論語**君子可逝也不可陷也

是其義也故猶戒之曰勿用

象曰來之坎坎終无功也

詩其何能淑載胥及溺終无功之謂也

六四樽酒簋贰用缶納約自牖終无咎

儀禮司宮尊兩甒於房戶之間樽所以盛酒者**周**

禮族人爲簋實一穀簋所以盛食者**周禮**大祭三

貳中祭再貳小祭一貳貳所以益之也**禮記**五獻

之尊門外缶門內壺君尊瓦甒此以小爲貴也蓋

取簡約之義**周禮**朝踐用兩獻尊兩大尊再獻用

兩象尊兩山尊饋獻用兩壺尊尊皆有鼻此卽或
用缶之義缶用陶器亦尙質之意**周禮**司約掌邦

國及萬民之約劑治神之約爲上治民之約次之
治器之約次之治摯之約次之凡大約劑書於宗
彝小約劑書於丹圖神人之交皆有約書之於器

以通誠結信此納約之義也**周**于以奠之宗室牖

下此自牖之義也**左傳**苟有明信澗谿沼沚之毛

蘋蘩蕒藻之菜筐筥錡釜之器潢汙行潦之水可
薦於鬼神可羞於王公禮雖薄而誠則通亦處險

而無阻者也故曰无咎禮記約信曰誓又君子約言約者言之簡而有信者**爾雅**牖戶之間謂之扂注東曰牖西曰戶牖所以受明之處**國**天之牖民**又**牖民孔易自其所明以通之故曰牖也兩坎相通幾不在大可以見納約自牖之義故於此爻發之

象曰樽酒簋二剛柔際也

孟子其交也以道其接也以禮苟善其禮際矣此

際之義也剛柔謂四五之交也

九五坎不盈祗既平无咎

禮記志不可滿不盈之義也 **家語**孔子觀於周廟

有敝器焉虛則敝中則正滿則覆明君以為至戒

故常置之坐側是坎不盈祗既平之義也子路曰

敢問持滿有道乎子曰聰明睿知守之以愚功蓋

天下守之以讓勇力振世守之以怯富有四海守

之以謙持滿者无咎之道也

象曰坎不盈中未大也

五居坎體上卦之中 **孟子**附之以韓魏之家如其

自視欲然則過人遠矣中未大者不自滿假之義也
孟子君子所性雖大行不加焉雖窮居不損焉
分定故也坎不盈而既平不加之義也坎有險而
求得不得之義也在二則曰未出中在五則曰中
未大性分之定即剛中心亨之理也

上六係用徽纆寘于叢棘三歲不得凶

論語雖在縲紲之中獄中以黑索拘繫罪人所謂

係用徽纆者也**爾雅**徽止也說文徽三糾繩也玉

篇大索也係用徽纆有止之義**周禮**秋官朝士建

邦外朝之瀕左九棘孤卿大夫位焉右九棘公侯

伯子男位焉故曰叢棘

禮記

獄成大司寇聽之棘

木之下是真於叢棘之義也

周禮

司圜收教罷民

能改者上罪三年而舍中罪二年而舍下罪一年

而舍其不能改而出園土者殺雖出三年不齒三

歲不得凶此之謂也

象曰上六失道凶三歲也

孟子盡其道而死者正命也桎梏死者非正命也

是以謂之失道

論語

孟氏使陽膚爲士師曾子曰

上失其道民散久矣如得其情則哀矜而勿喜初
日失道凶下之失道由於上之失道故明之曰上
六失道凶三歲也可以知仁人君子之用心矣 **左**
傳邾子無道吳子囚諸樓臺梃之以棘此亦失道
之徵也 **左傳**京師殺尹氏固尹固之復也有婦人
遇之周郊尤之曰處則勸人爲禍行則數日而反
是夫也其過三歲乎此亦凶三歲之驗也

三三 離下
離上

離利貞亨畜牝牛吉

離不離于裏離者附着之義所以為麗**禮記**離坐

離立毋往參焉離立者不出中間兩相麗謂之離

卦畫之象形亦如此案文離從佳鳥屬從萬鳥之

文也**詩**瑣兮尾兮流離之子疏以為鷓鴣是也舊

說有以為南方朱鳥者象離之位**書**日中星鳥是

也**爾雅**大琴謂之離變聲之流離亦取諸鳥也**左**

傳純離為牛乾為馬震坎亦為馬坤為牛離亦為

牛各從其類也**禮記**合累牛騰馬游牝于牧牝牛

取其柔順也**周禮**牛人掌養國之公牛以待國之

政令養者畜之義也。禮記犧牲毋用牝祭則取其
純潔之體畜則取其中順之性也。坤以全體配乾
而行順而健者也。故利牝馬之行離以二五得坤
之體順而又順者也。故利牝牛之畜。中庸自誠明
謂之性自明誠謂之教誠則明矣明則誠矣。次之
中實而心亨自誠明之謂也。離之中虛而利貞亨
自明誠之謂也。

象曰離麗也。日月麗乎天百穀草木麗乎土。重明以
麗乎正乃化成天下。

禮記郵罰麗於事附也**書**不克開于民之麗依也

依附皆麗之義也**禮記**祭之日君牽牲既入廟門

麗于碑畜牝牛者亦取麗之義也**禮記**日在營室

詩月離于畢**禮記**司天日月星辰之行宿離不貸

有所次舍以著其光日月麗天之義也**中庸**日月

星辰繫焉麗天之象如是**書**播時百穀**詩**播厥百

穀爾雅翼曰梁者黍稷之總名稻者漑種之總名

菽者象豆之總名三穀各二十種蔬果之屬助穀

各二十種凡百穀是也**爾雅**草謂之榮木謂之華

有所附着以發其秀百穀草木麗土之義也**詩**彼黍離離又其桐其椅其實離離麗土之象如是**禮記**日月無私照重明以麗乎正也**語**子所過者化**中庸**無爲而成乃化成天下也賁之象亦曰觀天文以察時變觀人文以化成天下皆離之德也

柔麗乎中正故亨是以畜牝牛吉也

詩柔嘉維則所謂柔麗乎中正也重明麗正以全卦之體立義此以二五取義故又曰中正也**書**沈

潛剛克高明柔克彊弗友剛克變友柔克坎曰剛

中卽剛克之義沈潛以水言也設險之守所謂彊
弗友也離曰柔中卽柔克之義高明以火言也畜
牝牛之吉所謂變友也

象曰明兩作離大人以繼明照于四方

左傳天無二日重離故以兩作象之**書**寅賓出日

寅餞納日日有出入明兩作之義也**中庸**如日月

之代明月以繼日兩作之義亦取乎此**書**亶聰明

作元后元后作民父母作者起也所謂聖人作而

萬物覩也**左傳**照臨四方曰明離之象也**詩**學有

緝熙于光明繼明照之謂也。書惟我文考若日月
之照臨光于四方照四方之謂也。乾文言大人者
與天地合其德日月合其明卦象惟此稱大人蓋
本乾之二五而言。書曰若稽古帝堯曰放勳曰若
稽古帝舜曰重華協于帝。又昔君文武宣重光臣
之繼君子之繼父大人之繼明照皆重明之象也
水曰洊至行地之不息莫如水也。明日兩作行天
之不息莫如日也。論語學而時習之習坎之義論
語首舉之象水之洊至日以常德行習教事。



孔子曰我學不厭而教不倦是也**大學**大學之道
在明明德重明之義大學首舉之象明之兩作日
以繼明照于四方**大學**古之欲明明德於天下者
是也此皆乾之健行不息也聖學之始終以之坎
離所以爲上經之終與

初九履錯然敬之无咎

大戴禮履之銘曰慎之勞勞則富履在下而勞錯
然之所以宜敬也錯然有以火之始然爲義者**左**

傳秦穆夫人登臺而履薪焉此所謂火未及然因

謂之安者亦危而宜慎者也**公羊傳**諸侯雜然侵之雜然卽錯然之謂也**詩**爲賓爲客獻酬交錯禮儀卒度笑語卒獲賓客交錯履之錯然者也卒度卒獲敬之所以无咎也

象曰履錯之敬以辟咎也

禮記行肩而不併不錯則隨注雁行也不敢先人是謂履錯之敬**禮記**戶外有二屨言聞則入言不聞則不入君子隨在必敬卽此可以觀辟咎之義二屨尙爲引嫌况履錯之地乎

六二黃離元吉

左傳黃中之色也離與坤同德坤曰黃裳元吉離

曰黃離元吉 **書**雍州厥土惟黃壤厥田惟上上五

行莫貴於土五色莫盛於黃坤之正色離於二陽

之中也所以為元吉 **禮記**中央土天子駕黃駟載

黃旂衣黃衣服黃玉四時土寄旺於火故同其德

也

象曰黃離元吉得中道也

白賁在外取反本之義黃離在中取得中之美 **論**

語堯曰咨爾舜允執其中是得中道也書欽明文思濬哲文明得中道者由於文明之主相繼也

九三日昃之離不鼓缶而歌則大耋之嗟凶

書自朝至于日中昃離初爻爲朝二爻爲日中三

爻爲昃論語日月逝矣歲不我與所謂日昃之離

也詩坎其擊缶瓦缶可以節樂者詩子有鐘鼓弗

鼓弗考宛其死矣他人是保又旣見君子並坐鼓

瑟今者不樂逝者其耄不鼓缶而歌則大耋之嗟

此其義也左傳曹大子聞樂而歎君子曰非歎所

也不歌則嗟亦有失常之義書五福一曰壽六極
一曰凶短折大耋之嗟所以爲凶孟子夭壽不貳
脩身以俟之所以立命也立命則不至於凶矣論
語發憤忘食樂以忘憂不知老之將至此則聖賢
之道也何計夫日昃之離何有於大耋之嗟哉

象曰日昃之離何可久也

左傳趙孟視蔭曰朝夕不相及誰能待五又曰老
夫罪戾是懼焉能恤遠吾儕偷食朝不謀夕何其
長也何可久者其志已衰矣

九四突如其來如焚如死如棄如

爾雅植謂之傳傳謂之突註戶持鎖植也竈戶直

上以通烟者亦謂之突突如者始不及防終不可

遏**詩**突而弁兮字義如此也**周禮**掌戮凡殺其死

者焚之此焚如之刑也**禮記**君子曰終小人曰死

死如之義也**禮記**刑人於市與衆棄之棄如之義

也**左傳**惡之易也若火之燎於原突如其來之象可見

象曰突如其來如无所容也

孟子率土地而食人肉罪不容於死**又**殃民者不

容於堯舜之世不順之至者焚死棄皆无所容也
六五出涕沱若戚嗟若吉

詩涕泗滂沱憂甚之象也**孟子**顏色之戚哭泣之
哀弔者大悅五爲君位得中繼明之時此宅憂謀
闡之禮故但言其哀戚之象如此是以爲吉**書**王
祖桐宮居憂克終允德**詩**閔予小子遭家不造嬖
嬖在疚於乎皇王繼序思不忘皆出涕戚嗟之吉
者也**左傳**在戚而有嘉容豈能自振者哉

象曰六五之吉離王公也

周禮坐而論道謂之王公王爲天子公爲諸侯特
舉六五之吉以其位明之也論諂君堯百官總已
以聽於冢宰三年書高宗夢賚良弼文乃同召大
保畢公芮伯彤伯衛侯毛公王之寄命於公者皆
離王公之謂也書拜手稽首旅王若公離王公者
王與公相依卽五之與上也

上九王用出征有嘉折首獲匪其醜无咎

書嘉乃丕績故曰有嘉詩執訊獲醜薄言旋歸詩
鋪敦淮濟仍執醜虜訊謂魁首也醜謂徒衆也書

膺后承王命徂征曰今予以爾有衆率將天罰火
炎崐岡玉石俱焚天吏逸德烈于猛火殲厥渠魁
脅從罔治承王命者王用出征也曷魁者折首之
義也罔治者匪醜之義也象火之明而又戒火之
暴无咎之道也公羊傳其言滅獲何別君臣也君
死於位曰滅大夫生死皆曰獲此獲之義也

象曰王用出征以正邦也

孟子征者上伐下也敵國不相征也故曰正邦書
大邦畏其力小邦懷其德正邦之義也坎之上爻

言刑離之上爻言兵孟子有恒產者有恒心無恒
產者無恒心苟無恒心放辟邪侈無不爲已及陷
乎罪然後從而刑之是罔民也焉有仁人在位罔
民而可爲也無恒者蔽於習也叢棘嶽纒陷於罪
也三歲不得而後凶君子之不罔民也觀坎之義
知用刑之道矣左傳夫兵猶火也弗戢將自焚也
焚如棄如爲惡之逆者象諸火也詩如火烈烈則
莫我敢遏苞有三蘂莫遂莫達折首獲醜除暴之
猛且速象亦取諸火也觀離之義知用兵之正矣

坎離爲乾坤之大用兵刑爲帝王之大用上經以
此終篇下經亦以既濟未濟終篇其旨遠矣